

詩

楓皋集  
三





楓皋集卷之五目錄

詩

倚樓

次蓮社韻

贈石閒

梅下

五首

陪扈郊館馬上喜賦

元朝

二首

竹里叔示和經山學士次斗室太史別香山詩  
韻喜其醇真率步成之乞同藏山寺



敬次石室先祖中臺絕句韻

二首

春曉睡起

過李性老鄉居

盆中種石菖蒲

題藏書室

坡翁有朱竹蓋戲墨也今倣之

苦雨中聞有禋祭之議走筆用韓文公韻賦示

金李二詩人

健陵遷奉挽章

六首

孝懿王后挽章

五首



病枕偶成

送病

寄申翠微按使

初學老人贈天民

病枕曉起吟絕句示道根

二首

次坡公賦梅韻

二首

睡起

春暄

次杜絕韻和道兒惜春

十一首

雲軒戲題

三首



悼老

次蓉城見寄韻

次迫根韻

憶玄巖田舍

三首

生朝

哀孫女李氏婦

三首

戲贈丁生

春朝思鄉

喜風日和暢

顯穆綏嬪挽詞

三首



驪州路中

車上

松坡待渡

奉呈李叅判

普天

就養淮陽

二首

病河魚飲冷水卽已

病裏忽厭聞肉臭及瘡猶然

次左根觀水韻

秋日訪張氏園

與沈孝田趙斯隱金石閒入山終日逍遙夕燈

戲賦



馬上嗅菊花

思圍棋不得

哭李諮議

友信

遊東嶺

自悼

古詩寄呈斯隱孝田石閒三老友

夜與李天民賦此朝起書贈

曉枕偶題絕句寄示元根

仁人

病退贈逋仙老人



次鄭生濟鳳見贈韻送歸

月圓

梁坪小憩

過津寬村舍

載書送玄巖新庄

二首

喜雨笠履行田吟示諸君

感春

春郊遇靈源僧

應彥師求屏書

二首

栽桃



種桑

媳婦菜

聞徐領府

龍輔

計

佛巖川獵魚

二首

望月

村人鰾塘水捕魚

雙嶺店舍夜聞二客鼾聲如雷戲賦長篇以嘲

之

秋夜與石閒匡山同賦

二首

復用寬字



沙峴口占

善竹橋

劒水路上感舊

黃坡道上望中和諸山

遊棲雲寺

月林望香嶽

觀西山大師影仍次西山大師韻

別香山

出山

价川途中



鸚鵡洲

箕子殿

示元根

箕子墓

永明寺懷古

黃州途中

葱秀店夜聽雨次鄭知常韻

叙闊

過溪西村家

秋暮感懷



擬古求僊吟

送宣生宗漢南歸

送上价權裝好

贈副价李叅判

光憲

次湖南伯水仙花韻

古履贈孝田

贈別李士昭

義玄

赴任黃州

余平生有五願自知天荒地老無有諸時甲申  
除夕遇問菴柳本學語之願勸其爲詩祝之  
詩成工麗可觀遂信筆步韻相對一笑亦新

年樂事也

古詩一首賀菊隱庚稷周甲

玉壺晴夜與金子健石閒蓉城賦

閒思

津寬次石閒韻

宿津寬寺

花下待蓉城不至

僕常謂暑熱雖苦夕涼單衣引眠風軒其趣非  
煖帳斟酒可能相方蓉城貧士而韻者倘知  
之乎率吟奉質乙酉夏五之廿有七夜



憫旱

警婢

述旨

夏日同洪季臨赫携一客訪寧野戚弟徐穉秀

俊輔

江居君素亦卜其隣

秋曉聽雨

秋霖

恭和 睿製晬日頒詩之什

李泊翁適至與石閒匡山蓉城用劔南詩韻共

賦

禁酒

近體奉寄黃岡使君六十一歲庚席

玄巖次蓉城寄示韻

夜坐拈唐人韻

次道根共諸客詠月韻

金生拈韻共賦

夜寒

贈靈源菴致鑑上人兼示諸禪

玄墅臨歸寫竹扇面仍題絕句與鄭生濟鳳

雪夜寫竹



次李天民梅花詩

五首

哭石間

題東寧都尉西軒

次柳伯教除夕韻

二首

用華人韻與客賦春草

晴日射的

題書花之室

驢死

玉泉庵

次蓉城寄示韻

挈家眷歸玄巖新舍水陸分路而行

途中卽事

宿斧村池舍

入舟

二首

二水頭曉起聞雨

行船

二首

下舟入香谷

八首

過溪村見桑者

山丁送桃實與穉秀同嚼賦之

螢火



次沈孝田聽雨見懷韻 二首

秋懷二十一首

丙戌季秋宿欣涓館作 三首

丙戌初冬初六脩稷作

贈別上使洪仲深 義俊

別副使申翠微 三首

楊僉樞澤九有書相問遂贈以絕句及南菓十枚庸答前秋壽詩之惠

與社中人共賦

水仙花

夢得一聯朝起足成丙戌臘月小寒也

待義民不至

夜爲墨戲傍人爭取之漫吟長律

除夕



楓皋集卷之五

詩

倚樓

檻清離地迥窓豁納天多縱欲早眠已其如新月何  
微涼生竹語遙夜靜簾波自古登樓感逢秋抵不過

次蓮社韻

萬事盈虛只管天蕭蕭鬢髮感流年頭顱已判無須  
卜心跡相違孰可傳秋意潛歸楓葉裏雨聲疎到菊  
花前悠然倚杖溪扉外緬仰當時子在川

贈石閒

君猶安茆屋無屋竟焉哉永念寒儒狀應稀故友來  
解衣看着罷呼酒進斟催即可忘冰雪休辭數賦梅

梅下

夜冷山牕篝火殘梅前耦坐嗒相看問君暗聞生香  
未覺不分時義更難

色觸都無一點塵生來難作鼻觀珍天寒歲暮深深  
坐緬憶當年泣素人

一枝橫出碧紗痕輕雪疎疎朔吹喧看道冰清祇熱  
眼元來崑玉自然溫

佩玉之儺巧笑倩展如人也靜其姝相逢邂逅于林



下一束生芻願秣駒

新枝迸直舊枝斜  
豎倒生生次第花  
一自樂窩觀占後  
眞成象數大方家

陪扈郊館馬上喜賦

天時人事本無違  
比日陰晴驗不非  
客使庭臨先雪至  
君王郊餞贈春歸  
尋常莫認流行運  
冥漠猶存幹旋機  
更卜明朝黃襖出  
八方寒士尠裘衣

元朝

此日君言太可憐  
恩恩隙駟一周天  
縱令重見來辛巳  
猶比唐堯減兩年

盡歲憂愁不展眉云胡餞舊却淒其可憐甲子重回  
日應是兒孫話祖時

竹里叔汴和經山學士次斗室太史別香山詩  
韻喜其醇真率步成之乞同藏山寺

山兮山兮袤橫千里聳萬丈不藉夸娥之肩巨靈掌  
名以妙香亦異哉非色非相非取象有神人生檀木  
下石窟中厥妣云熊尤恟怳至今檀木森成東土人  
取材如府帑西遊之子登絕巔捫歷參井之曄呼吸  
沆瀣之爽余自少年仕宦日此地常願作官長思爲  
仙區飽看之不在屋潤兼身養種種宵寐渡薩水精



發爲夢夢因想經山容易爲主人竹叟斗翁踵豪賞  
等是騷人結山緣余獨胡爲難天上去年經山寄全  
圖手披目動神愈往今日復讀三傑作句語恢奇音  
風泱瑀林繡壑雪瀑雲壁丹梯翠鑠宛在前令余遂  
欲與鸞鶴翔兮虎豹麋鹿共偃仰遙爲山靈致賀語  
古來未有此誇獎余亦忉然湧奇氣意沿三作更推  
廣百聞終遜一見親臨風不覺思惘惘才怯思枯奈  
山何抖擻下筆多牽強未論狀山未真面文苑勝事  
猶髣髴初心續貂雖不量大抵難拋是技癢又幸公  
輩昔似鼎三足輾轉得余爲車兩四軸長與鎮祇林

千年不離影與響我想自此光燄夜夜燭四山佛尊  
歡喜逃魍魎

敬次石室先祖中臺絕句韻

痛哭人間倒屣巾深山鳥獸可同羣祇今試覓先生  
跡惟有清風與白雲

丁年往事足霑巾三復遺詩見怨羣誰葺斯樓遙乞  
額潭師願力愧仍雲

春曉睡起

誤驚窓月曙光知起得棲鴉未動時花氣沈沈烟遶  
定蛛絲耿耿露懸危  
瞢騰萬戶良宵短澹蕩千林麗



景遲不省園亭醉裏事衣巾猶覺墨痕滋

過李性老鄉居

豈忘田園樂居然日月移樓臺經野客冠冕艷街兒  
宿麥抽新穗虛舟泛舊陂擬陶亭有扁叢菊待東籬

盆中種石菖蒲

端居感林園紅紫久銷落忽見石盆蒲青潤映簾閣  
劍脊競尋丈宜生如在澤時序亦易得蠶繭麥將穫  
遷化日紛然把翫寧可博念念百年間悠悠行邁客  
所以古人情謂言此日惜采采可引齡不嫌山酒薄

題藏書室

籤帙齊齊奠閣尊經經緯史百家繁俸錢買盡頗心力  
標記題多更手痕詎必他年窺脉望端須除夕酹  
長恩舌耕應得承先業老悖吾將爲子孫

坡翁有朱竹蓋戲墨也今倣之

研朱點易還無賴却倣蘇仙寫竹竿勁節清風依本  
分更憐呈露片心丹

苦雨中閨有禋祭之議走筆用韓文公韻賦示  
金李二詩人

擘龍辭窟不肯歸長夏茫洋在天飛噓雲致雨孰覘  
微微休反咎不知非急攢銀竹緩散璣窮晝通宵見



所稀屋雷傾瓶罍四圍坐傍語笑聆依稀窓前一堆  
螺鬟暉使我無端三月違葩卉腐爛失芳菲宮商暗  
啞弛絃徽陸行者無賴牡駢水居人不見魚磯葬雖  
不克曷可譏送固伊邇莫踰畿人藉於神神人依龍  
乎瘠人爾何肥不爾徼惠將誰希上帝心仁坐深巍  
快收茅馬卸羈鞵好放晴霞絢絳緋農夫啜泣饁婦  
啼秋將無食冬無衣往不可追來可晞鋤培剩殘望  
猶幾垣壞壁敗洞閨闈庭遍蚯蚓室蚺蜥忽承綸言  
詢虔祈城門設榮幹化機起瞻上林靄餘霏霧裏稍  
稍露薨輦太陽赫赫太陰妃照臨萬物蘇其腓阿香

杞穀斂虐威速滅者殃臻者穢我頌 聖德欲發揮

墨如絮漆毫如韋寫寄與誰悍或頎短長相挈欵余

扉

石開短小精悍  
菊隱頎然而長

健陵遷奉挽章

樂利親賢廿載餘蒼梧雲斷太空虛寧期復覩 玄

和出恍惚神情墮寫初

青鳥多憾國人稱獻敬之心 太母承痛矣庭詢差

未早徽音長樂又難憑

稍西而近似東偏長與 仙園隔一阡九月旬三人

葬 聖千秋防合卽灤遷



遷園昔事隔晨攀御袖痕生淚血斑貽厥欽承

惟孝已又瞻深墨戚龍顏

雖今在御古稀強那不悠悠恨彼蒼一紀少延猶  
得及文孫之慶自文祥

帷幄餘蹤肺腑親悲歡閱盡鬢成銀縱然夢裏時承  
覲常恨醒回記不真

孝懿王后挽章

東方五紀母臨尊薄海含生載厚坤文武衣冠多白  
首雷號雨泣送靈輜

宇宙茫茫代序遷摧心追憶泣弓年玉欄花發知何

處此日人間哭望天

外人私語漫云云寶瑟鳴璜自在聞不緣地道承天  
順愛敬如何得 聖君

寶冊無心顯號加誰將彤筆頌莘媧濯龍門下車塵  
少肯許私恩到外家

周天甲子舊舟梁賁喜知年 聖孝光誰謂輿情謠  
海屋真遊遽邈白雲鄉

病枕偶成

并序

續命後第二夜枕上偶成此詩蓋心界虛明  
如赤子無一雜想而病前已屬前塵甦後當



數新緣故遂自號曰初學老人意欲刮去舊  
習自勉新功以答天地再生之恩而非讀書  
則不可故末句如此

縲命甦回體尙虛蟲聲遙夜意何如深慙魯叟天時  
律空恨唐人日月除形役分明生與盡憂虞瀕洞死  
應餘從今擬作童蒙吉更授當年未了書

送病

長孺請告數孟浩故人疎休文瘦入詩司馬渴著書  
疾病何累人名士自古初良由頑氣祛洞然積清虛  
猗彼蘭蕙質風霜每易沮櫟樹雖千年匠石棄不居

達觀無所忤至樂常有餘嘯歌宛舊態隣梭亦奈如  
爲語二豎子速去勿躊躇縱爾欲困人今我尙故余

寄申翠微按使

滿紙離憂思政紛搔頭吾亦有云云兩心舊托如蘭  
契多口新憎詛楚文羊叔酖人誰肯信卓公還馬子  
猶聞也知有竹山房月應徹蓬萊池閣雲

初學老人贈天民

夙昔他無嗜好深思將螢蠹比儒林聖賢已死猶眞  
面天地何言竟苦心脊薄愁擔千古事喉嘶強答太  
初音臨歧却似亡羊子日暮人間白髮侵



病枕曉起吟絕句示道根

食味初迴氣亦隨  
燈光倚枕念新詩  
昭昭漸集昏昏去  
妙境依然欲曙時  
沉冥一退體如新  
善自萌端悟有因  
多病年來君莫歎  
安知天不玉成人

次坡公賦梅韻

昨夜窓前只數花  
朝來樹樹玉枝斜  
謂言詩伴從今始  
呼我陽春白雪家  
窓外紛紛亂雪飛  
憐他凍樹借花枝  
清香不斷琴書靜  
忽到人花兩忘時

睡起

睡起梅花底無人獨啓門  
晨霜如雪厚晝日定春溫  
櫪馬銜槽立棲鴉繞樹翻  
遙看烟際岫頗憶斗陵村

春暄

青帝操何術能令積雪開  
山如仁者相風有惠然來  
門柳初明眼溪花漸頰腮  
老夫亦減閒步日登臺

次杜絕韻和道兒惜春

年年花柳看無厭作箇詩  
顛與酒狂誰道顛狂天復  
禁三春端不病離床

記得前年北澗濱東來西去過  
全春如今屋裏深深



坐草綠江南又送人

九旬怊悵憶山家  
墻杏庭梅謾着花  
回笑老申頻掃  
逕別人迎送作生涯

紉簾西畔曲欄東  
鈴鐸郎當響晚風  
何事窓前山躑  
躑飛紅時節始開紅

詎必春忙與花惜  
流光祇是自家催  
君看今日紛紛  
落政爲明年滿滿開

風床寂寂夢初醒  
起看芳陰覆小亭  
眼底花鬚成蝶  
去那知久竹不青寧

尋常覓句多禪語  
造次看書愛道家  
祇爲無人來起

我獨持玄解了殘花

太怪三清橋畔老經過不似嚮來頻  
花開花落西園裏春酒盈盈謾待人

不知誰遣雨風來紅一回旋綠一回  
沒得心腸爭日月祇殘春色奈深杯

愁雨愁風不出頭臥思新綠漲汀洲  
明朝擬踏黃驪路烟景殘春最上流

誰道鋪花勝繡氈難將買醉恨苔錢  
世間名實多如許一枕黃梁又客眠

雲軒戲題



舟居無水陸無家常愛張融此語佳比日山樓權住  
着却教屏帳碧山遮

綠樹成陰亦可憐溪頭回笑一怡然今春枉喜逢春  
閨多病誰知甚去年

參差松影覆蒼苔乳燕鳴鳩晝靜哉繡罷黃庭支枕  
臥楊花委曲度簾來

### 悼老

筋骸日以弛衣帶非可束菁華日以竭膏沐非可沃  
居然老醜身荒繆臥空谷初志問何遂往咎知莫贖  
俛俛增屢欷睠茲清溪曲溪雲自卷舒人事誰榮辱

緬想青春時如日始朝旭萬象歸富有充盈無不足  
誦書祇過目覆碁每整局清明積中心前脩慕彌篤  
人言亦復虛所好移所欲軒冕却誤人日月更相促  
芻狗望已陳藩羊成自觸造物真太劇靈性此還牯  
色笑徇世情恆居甘碌碌蛹枯亦縑繭和別猶琢玉  
迫死無可畱何以後人告俯仰宇宙間感慨憂常續  
憂來倚孤松酌言春酒綠春酒豈照心山月皎於燭

次蓉城見寄韻

長夏多清賞楓陰坐臥頻蕉今如鳳尾松古自龍鱗  
寓物聊娛我流年恐負人間中時覓句山色看逾新



次迢根韻

疊鼓轟雷竟是空  
汝應明了水聲中  
龍門積石無關鑿  
赤岸銀河本自通  
老病宗文琴動響  
悲歌阮步轍迴窮  
人生開口談天地  
今古誰曾識始終

憶玄巖田舍

黃驪水綠復山峨  
黼黻其能換薜蘿  
萬事聽天誰忖度  
十年相地幾經過  
蕭蕭素髮風飄雪  
滾滾紅塵日逐波  
康濟經綸都疊了  
胷中孤負舊書何

筋骸耳目日無能  
伏櫪寧論志氣騰  
萬事都違猶混俗  
六親雖具每思僧  
前脩名業書中識  
早歲繁華夢

裏憑一自去秋瀕死起浮生更覺似風燈

安得身披野老衫坦開皤腹臥蒼巖菜根山裏多芳  
潔泉味城中久鹵醢強笑耐疼緣拜客眼昏神耗爲  
裁絨愁來坐憶春江水雲影遙隨溯峽帆

生朝

甲子大都祇六十生朝五十八回逢一彈指頃明年  
至何異嗣宗車轍窮

哀孫女李氏婦

無母呱呱鞠育疎恆憐孺慕淚凝裾嬰嬌出腹旬纔  
百悲絕如今甚汝初



視天冥漠竟無言不合而生在我門知是神明猜太  
盛却摧男女九兒孫

翁嗔無怕怕爺嗔嗟笑雛音每破顰嬌戲從今寧再  
見惟應魂魄夢相因

戲贈丁生

老而不死丁天與謂我今冬病必嬰百筮不曾見一  
中此番巧湊豈神明

春朝思鄉

朝日升東臯麗彩颺清淑輕寒弄條達春氣回園木  
皚皚南山雪胡然尙畱宿雪宿亦偶爾江流縠已蹙

遠憶鄉里事田家窮旨蓄婦媪偕鬪又携鋤採苜蓿  
其味肥而甘湘之軟勝肉余性嗜食此又愛黃卷熟  
繞屋有翠柏經冬多細竹歸去詎云早不見如在目

喜風日和暢

廿四番今第幾風山螺野馬藹然中定教陰壑回元  
氣無復纖塵滓太空草色朝暄新吐綠花枝夜雨暗  
胚紅坐看時物佳如此均是重生荷化翁

顯穆綏嬪挽詞

芝有靈根醴有源縣縣積慶治翁門六宮相賀盆繅  
吉朱綠玄黃佐采蘋



夢維懷日歲維庚堯母門開慶八紘一自祿祥天啓  
後萬年瓜瓞 聖神生

中泠浦咽拜峯哀旌翼翼悠悠去不迴頭白詞臣無限  
感入宮曾覩盛儀來

驪州路中

婆娑城下江光好趁揖山前土脉肥早識吾鄉如此  
樂被誰牽住不能歸

車上

清風吹斷陌頭塵輾轉閒思逐逐輪汨瀟山泉偏警  
耳綿芊野草欲傷神梁雌只可供三嗅芻狗何嘗望

再陳自笑餘生誠老悖猶然想作讀書人

松坡待渡

松坡鎮北大江流碧柳毵毵罨小樓落日含沙情自  
急向來風景宛今愁

奉呈李叅判

普天

就養淮陽

先人執友慙如今厚德高齡仰獨深賢胤名區榮養  
就送公那抑鮮民心

聞道金剛萬二千形形坐佛與飛仙一峯一日爲公  
壽富有從今三十年

病河魚飲冷水卽已



初飲七椀藥泉取再飲東井倍厥數三飲西巖巖下  
乳加二於初減再五兩日三十椀入肚便便大腹如  
輓鼓滌盪炎伏與痰聚神清氣爽開秋宇河魚之疾  
卽日愈不煩刀圭試口苦醫言此法傳自古舉措駭  
人太硬粗譬如猛士徒搏虎虎若不服悔何補今人  
凜凜氣一縷造次難能汗下吐况公六十輕二豎僥  
倖無災再勿怙我聽君言真酸腐醫者意也竅何敷  
毒痢不治壞臟腑飲冷如旱沃甘雨萬物之生水爲  
主水哉水哉歎尼父

病裏忽厭聞肉臭及瘡猶然

念功常歎殺牛非從俗吾猶喜嚙肥一嗅無端生惡  
阻今疴得不爲仁機

次左根觀水韻

爾曹觀水去佳境憶清真雪練雷殷地風簾雨濺人  
琴心應解妙詩語不畱塵往日吾猶健雲菴有宿因

秋日訪張氏園

凹僻茅堂受月難共携暝色佇林壇溪昏未辨雲侵  
席葉密堪遮露墊冠怱悵居人非舊識依稀畱墨似  
新看問君曾否遊東嶺山比茲深樹早丹

與沈孝田趙斯隱金石閒入山終日逍遙夕燈



戲賦

秋林窈窕多佳木霜露淒清葉黃赤起趁升暉携雙  
屐隣朋不爽前宵約兄弟泉傍暫憩息品水何減中  
泠滴更攀枯根度危壑屏澗逶迤屢轉曲忽到高岡  
送遐矚漢南粉堞隱山色佛巖峨嵯勢相蹴想像江  
流襟帶白躡下風磴弄鳴玉一夜疏潭見功積臨潭  
靠巖肆氎席當中突兀安碁局漢興鬚鬢皎如鶴國  
手聲價重京洛此日昂昂試矍鑠方罫閃映雙瞳綠  
指端攝子忽漫着吉日車攻不詭獲妙訣自傳碁家  
嫡後生汗僵爭企得我大歡喜看不足手斟紅露賀

破敵日午具饌喧山僕白杭黃梁共炊熟松蕈和肉  
薦炊炙菹醢菁菰醢郭索大家欣然已果腹或倚長  
松或枕石賣錫童子解演劇怪底伎倆能善哭哭不  
悲來笑反作笑聲如雷闌山谷百年大抵駒過隙哭  
笑之間君頭禿古人所以此日惜請君莫忘今者樂  
城裏四山如烟碧佳境由來最白嶽况是相逢無俗  
客忘形去態恣閒適一生知己長比屋十世通家連  
小麓白頭傾蓋又莫逆人間何快此事易不知山日  
澹將夕不知山雨疎欲落醉眼不愁山路黑聯袂拍  
肩紛雅謔我老猶堪七言屬搦筆燈前記盛躡我對



燈神發願祝年年如是賞楓菊

馬上嗅菊花

燦燦黃花耀櫺籬折來鞍上嗅多時臨歧不忍空拋  
擲收拾秋香也入詩

思圍棋不得

自從金老歸真後塵鎖文楸罕對時惟有兩般消遣  
法黑甜鄉外硯成池

哭李諮議

友信

雜卉蔓常滋嘉植護猶折寧馨果天心愚惑久私竊  
少微憂星沉流光悲電掣訃車忽震耳未語先泣啜

嗚呼讀書種謂竟今日絕相士六十年獨豔之子哲  
文道本非二聖死遂分裂汗隆不同趣汗漫千載閱  
左海襲箕訓世出國多傑之子奮衰末斯文啓不閑  
聰明早自師弘毅彌勵節衆目局邊幅大手獨領挈  
孟氏醇乎醇司馬擅峻潔百靈畢巨浸喬岳俯邱垤  
率性著發言中達誰並轍簫韶振清廟鄭聲自夏鵠  
天葩噴奇馥羣芳如覲雪雲錦爛瑞彩刺繡真猥褻  
昔韓庶相擬干祿又不屑瑾瑜物懷握屢空伏巖穴  
半千丁曠運昭代增光烈延促在厥初順化非憾切  
既有復無施今古恨所結蒼茫大澤闊迢遰丹山巖



龍鳳旣亡逝飛潛復何說巫陽招曷歸修文官或缺  
帝傍知多樂生者徒悲咽至寶必不泯百世徵著撰  
子雲雖後作寧復疑饒舌請代寢門哭腹痛郢斤輟

遊東嶺

三入吾何厭秋光滿洞天密林籠曉日青嶂破朝烟  
聽可移箏笛鋪無戀錦筵近城多水石佳絕此爲然

自悼

女哭男號徹曉哀家家知是再碁迴燈前自念當時  
事何戀人間又活來

古詩寄呈斯隱孝田石閒三老友

明月轉寒空輪光圓且厚直廬抱幽獨推窓屢仰首  
山居倍應佳悵然懷思久詎直山中景益者有三友  
三友共一隣日夕相携手苦窮莫斯隱自勵於陵守  
人龍昔聞蘇不意今沈叟照也信奇士島郊可匹耦  
清秋澗壑際論襟復對酒所尙諒不同悅我均非苟  
驚怯出衆下高明何見取衰世敦人倫此樂良不偶  
恆言好人無一例順萬口我以三友觀識者自希有  
稱驥須盡豢品玉必待剖大鍾雖萬石無聞由不叩  
貧賤士之皮寧足相妍醜今士亦天生靈性卽同受  
矧出頭角者何遽古人負悄悄萬戶前寂寂三更後



起坐誦明月兼歌佼人憫

夜與李天民賦此朝起書贈

惠好寧忘詠角弓相知恨晚古人風應侯心折傾危  
士龍伯名高矍鑠翁白雪吟成驚歲暮青雲意倦覺  
天空須知此夜梅前飲勝似凌烟畫裏功

曉枕偶題絕句寄示元根

嚴城迢遰曉鍾高隴樹關雲夢亦勞紙帳寒燈怊悵  
事漫教書面盡生毛

仁人

恩無私樹怨何叢祇信仁人必大公塗判陰陽知不

外生原天地性其中前賢豈忘傷明懼後俗猶貪獲  
詭功擊磬聲沈荷蕢死賞音千載更誰聰

病退贈逋仙老人

君持肘後方游戲人間世功德積不言神明應默諦  
顧余清臞質善病無虛歲去秋嬰疹毒一縷幾不係  
今冬忽所愆愆陽鑠榮衛君當望七年不復憚勞勩  
曉夜守我傍護我沉冥際妙技出尋常至論無滌懣  
死生雖本天人功資良劑再危終再安愚忖非所逮  
銜珠尙知恩垂淚能報惠人情獨無然方寸已深契  
但思渺長物相酬異俗例多生有結習口業頗靈慧



將此奉區區豈不當腆幣願君世世人令德又多藝  
往來敦舊誼爰及我後裔

次鄭生濟鳳見贈韻送歸

客窓驚攬歲華新忙束書囊爲省親北學耐消前臘  
雪東歸恰早故山春浮雲未必聊當世他日應須作  
好人耕牧樵漁無不可期君此去樂尋真

月圓

清光如舊望如新爲是經冬復入春今古炎涼何與  
爾悲歡濃淡摠由人山河影裏籠三界簫鼓聲邊照  
四隣六十回迎元夕至盈虧一理始知真

梁坪小憩

奚殊脫鞵鷹自縱秋霄澄目送川原曠身疑羽翮增  
繁花芳草又麗日惠風仍俯仰觀流化逍遙樂可勝  
過津寬村舍

西北溪流活東南山勢斜奇巖蹲異獸危堞走長蛇  
隔里或茅屋無人惟杏花逶迤入谷口春日意俱賒  
載書送玄巖新庄

束書封硯貯籠中江上歸颿待好風却笑吾身還自  
在忘妻徙宅古今同

人謂平生可自知悠悠吾亦熟思之縱然挽鹿終無



日猶似焚魚始有期

喜雨笠屐行田吟示諸君

秧針欲吐雨淒淒大麥抽芒小麥齊  
笠屐徐行看野色不知身世是雲泥

感春

睡中但聞風雨惡不像花開像花落  
瞳瞳旭日照窓櫺起視天光一洗碧  
樓前雙杏破露腮陌上細柳搖春脚  
黯黯衰情望東林文藻風流兩寂寞  
昔夢依稀非所戀年華怊悵空似昨

春郊遇靈源僧

野水迎暉細漾金東風搖蕩散春陰松間坐對菴僧  
話草色鄉思共不禁

應彥師求屏書

春歸白衲思南歸托我屏書三致意爾法從來一切  
無向人乞字還多事  
雖然多事他憐余余自俗人情未斷不妨春風揮灑  
之墨波搖蕩南溟岸

栽桃

栽插三年可作花千株定繞柵籬斜殘年此願如成  
就不啻芳名素封家



# 種桑

驅童斬櫟木不復間穉長待雨種柔桑覆茲十畝廣  
櫟盛當我垣歲年高尋丈四時蔽山月擬律其罪兩  
桑生沃我田條伐不多上山月旣無碍春蠶又可養  
但慙白首身黽勉隨班仗一歲計鄉居有幸再來往  
縱令蔚成林常對固閒想不知我死後功用誰終享  
富貴眞浮雲賢達襟自爽成都八百株慨然夙所仰

## 媳婦菜

春山春菜名媳婦漢陽城裏未曾有潔似接余柔似  
蕘淡可安脾芳可口遠客停筯忽有思古人名汝眞

不偶天下媳婦皆似汝世間應無惡姑舅

聞徐領府

龍輔計

雲端凝夕望獨立復何思歷歷歡娛日茫茫殄瘁悲  
暮禽棲不定流水去無疑蒙叟真先覺人生也有涯

佛巖川獵魚

野水迤山去通江五里纔蒼崖列佛像綠樹蔭漁臺  
葉嫩蒿包飯鱗鮮膾勸杯蓑衣從可借細雨不妨來  
臨水觀魚樂清風半日纔渺然濠濮想何處子陵臺  
紋蹙波生縠絲飛雨入杯旣晴應更好選勝約重來

望月



常看晝夜暗多明究竟陰陽未得平  
愚欲籲天天倘許日西沈處月東生

村人鰾塘水捕魚

鰾水探魚草遍塘勞多魚少到斜陽  
山僧不作慈悲念笑指明年竭澤方

雙嶺店舍夜聞二客鼾聲如雷戲賦長篇以嘲之

茆店夜深燈已滅却聞兩壁恠聲徹  
緩如牛牟輕駝圓悍如猱啗細鼠唧轉如寶石深塹撇引如大鉅堅木截忽如五百褒斜穴砰訇噴薄雷車掣聽官迷亂

職已失心驚膽怯真嚇殺良久抖擻始審察非天非  
獸非妖孽審是兩生困道熱睡中乖氣鼻中洩初疑  
頃刻息將絕旋喜須臾孔復缺噴時應免酒戶闕迫  
處得無腦袋裂千呵萬叱終不輟煩惱直欲拳頰批  
安得借王元一九泥塞窒永教函關無復闖

秋夜與石閒匡山同賦

匡山雙目石閒眉迸注尖撐苦爲詩月裏徘徊渾不  
寐還如斫桂姓吳兒

酒渴詩愁思沃茗四更窓外攪眠兒俄來東嶺遲遲  
月已掛西峰松半枝



復用寬字

暑去金風颯潦收玉宇寬中秋明月好良夜滿城懽  
載妓誰烟渚徵歌幾畫欄自嘲溪上步瀟灑影方冠

沙峴口占

駟馬檐車作遠遊臨風一笑向西州從前日月拋何  
處直待今年六十秋

善竹橋

公生天所爲故使值衰麗道在名仍重身亡國亦隨  
弔橋驚血蹟瞻像儼鬚眉不死無今日沾襟實可疑  
劍水路上感舊

館驛開函屬晚暉 天香驀地襲征衣  
經今三十年 前事眼裏森然一騎飛

黃坡道上望中和諸山

平蕪十里沒雲端 聯絡羣山只露巒  
馬首如今畱一面 練光亭上好看完

遊棲雲寺

躡下東臺迥棲雲 寺更幽澄江斜抱檻  
峭壁恰當樓 客到鍾聲晚鴻歸木葉秋  
使君移盛譙 落日駐山頭

月林望香嶽

下輿月林嶺遙謝山靈云千里而來者一朝爲見君



林林須展錦谷谷盡生雲黛翠迎新面竦然如謹聞

觀西山大師影仍次西山大師韻

觀音殿右清虛室遺像西山鶴立鷄千劫妙香知不  
壞師名應復與山齊

別香山

洞門猶是踏香山悵悵松橋第五灣漸次羣峯藏馬  
後尋常流水出人間殘年分斷重遊望兩日難言宿  
願還却下溪沙回首立教人更瘦已凋顏

出山

餘生何日得重攀身去心畱杳靄間寄謝清溪能解

意九迴相送過殘山

价川途中

夜雨無蹤曙色開  
歸心悵悵馬蹄催  
獨憐一派香山  
水兩日相隨不肯迴

鸚鵡洲

晴沙綺壁暎秋暉  
小泊扁舟上石磯  
鸚鵡何年飛過  
此祇今江色綠如衣

箕子殿

儘美蒼光麓巋然  
數畝宮父師如不國  
吾俗幾爲戎  
歲月行疇邈山川歷世同  
勗哉箕土士好德尙遺風



示元根

受汝專城養江山與意諧不時供綺饌成列侍金釵  
暇日身猶健深秋景絕佳桐鄉殊別地明發二人懷

箕子墓

拜罷殷師墓行臨浮碧樓重來期後世此別恨殘秋  
誰與傳佳畫吾歸作臥遊淒然投筆起回首又中流

永明寺懷古

東明遺蹟此禪宮千歲幡飄後夜風輦路三更山月  
白紺帷一炷佛燈紅神龍雨斷荒城外天馬聲沈石  
窟中古事微茫僧獨在江流日日遶欄空

黃州途中

班馬蕭蕭向日邊  
名區回首杳秋烟  
吾行不是江湖  
候來似春雷去寂然

葱秀店夜聽雨次鄭知常韻

送了繁華寂寞回  
悲歡生死此中催  
世尊也亦難挨  
得覓箇空無二字來

叙闊

叙闊仍秋興  
論文惜夜光  
沉沉蟲語壁  
悄悄月移墻  
火酒來山郡  
香梨摘草堂  
東南山水約  
歲月與君長

過溪西村家



蔓葉都除冷菜樊亭亭紅樹立秋原寒烟返照柴門外一路穿溪過小村

秋暮感懷

造物幹化機誰能覘其端人生苦局促眼前只偷安古來知無奈強名爲達觀今日諒非昨流水豈曾還端居值秋暮山深霜露寒卉木已無情幽懷理亦難日月自行天於人復何干安期不可遇明鏡欺朱顏豈無出塵想超然名利關將心爲形役賢智之所歎  
擬古求僊吟

富可以爲僊陶朱長不老貴可以爲僊秦漢得瑤草

煉丹適愚人虛名累神道惟有無名者一悟懷至寶

送宣生宗漢南歸

北風捲征袂羸馬念君歸千里雪如許再來春庶幾  
孝心忘客苦恩額耀先徽此別堪歎息殘年共古稀  
送上价權聚好

天馬挈空雲神鱗盪脩波豈不懷所居其如物性何  
之子喜遠遊卓犖渡遼河薊樹何迢遰關雲鬱嵯峨  
往歲副行人上价再經過風雪十月中把酒朱顏酡  
湖上老寒梅閨中嘖青娥揮手一爲別長路漫平坡  
題詩寄驛使聊以替勞歌



贈副价李叅判

光憲

子有休休長者風觀於形外識其中中州俊士昭忠信縞紵從來重海東

次湖南伯水仙花韻

榮枯冷煖割天時閱盡羣芳見異姿羅襪凌波搖翠袖銀臺暝日捧黃彝氣分庭蕙霜前馥魂返江梅雪後枝京國今年多種得憐君南館獨裁詩

古履贈孝田

我有一雙履得之歲月忘幸無牖上廢

孟子館滕業履者失之牖

上堪比庫中藏

漢武庫藏孔子履

溫厚材甄屬工奇製漢唐

今人不知愛君可躡風霜

贈別李士昭

義玄

赴任黃州

馬前張皂蓋翩翩却風雨帶間橫竹符百里有守土  
生死制其命吏民隨喜怒妻孥資俸廩家私免艱窶  
仕宦至郡縣亦足榮且臚猶然謂分憂非今伊自古  
憂者樂之反反樂義焉取吾君代天牧哀矜窮率  
普俾汝分予責與民作父母父母養厥子未有不勞  
苦饑飽及燥濕心慮在未覩視民如子然是爲答  
聖主矧今西土民瘡痍未全瘳死亡邑邑盡徵科依  
舊簿將無糊口粒寧有掩身縷鞭撻猶未已其生亦



曷怙仁者不忍人聞之足心腐之子親見狀何以計  
煦撫今人言循良輒稱漢召杜我思兩人者無樂居  
官府

余平生有五願自知天荒地老無有諧時甲申  
除夕遇問菴柳本學語之願勸其爲詩祝之詩  
成工麗可觀遂信筆步韻相對一笑亦新年樂  
事也

柳子賦除夕年年成條例余有五大願終老竟莫濟  
歷舉論柳子吟述代余計初一兩儀間東昇接西翳  
三百六旬六晝夜無障蔽其二寒暑故苦切人間世

命凜折綿威氣窒煽爐勢飲冷腹無癖履冰足不滯  
涼燠適化化斯已卽大惠第三是人身穉老殊完弊  
方壯旭日出旣衰天地閉得蒙造物恩都不隨年歲  
初生至成童氣全知思慧保此遂康寧及耄如始髫  
精力自互周志氣不相厲堅脆因所稟作用各勿替  
脩短雖未齊天年盡乃逝次四鰭去骨入口恣吞噬  
終五喫菰菜絲無胃齒細人願天欲從難易異品第  
顧玆願在天不費而可繼柳子聞稱善揚藻信工麗

古詩一首賀菊隱庚稷周甲

人生只一身生日寧有二年年稱未休已甚虛而僞



矧彼回甲云識者復堪唾流俗起何代人人看大事  
室家動相慶紛然具酒食賓朋競賀祝岡斗以揚觶  
君與余降生歲同春秋異孟陬日惟人卽君揆度至  
揖余便言歸真不免俗累余亦不免俗却思與相戲  
爲詩並寫竹走僕煩寄致更有苞苴餉種種十有四  
遙想松檐下君方倚半醉簾間應妻孥庭畔酬隣比  
吾書達是際驚喜忙披視臨風笑呵呵感公殷勤意  
玉壺晴夜與金子健石閒蓉城賦

飲中各言志晴月垂亭幔此席合狂態余方倚醉半  
誰謂川無梁亦知隰有畔詩道固不易請爲諸君斷

子健殊有毛穉鳳未具翰飄逸推蓉城天葩耀璀璨  
石老老彌工源流溯兩漢衆美畢呈露鹵材愧樗散  
勉強言所慕願誦關雎亂相顧笑閨堂直到明星爛

閒思

人心天意兩相違吟病山窓事事非送客南鄉新贈  
策憶僧西寺舊畱衣巖谿雨宿藤蘿暗澗戶春窮烟  
火微怊悵裁詩詩未就茅檐已見暮禽歸

津寬次石閒韻

午飯山僧勸猶思戊午秋砮崖非昔逕潺澗似今流  
悅感三生石重攀七寶樓洞天洵窈窕與爾欲分邱



宿津寬寺

春氣催人適野心  
津寬寺僻愛重臨  
鳴沙泯泯新流活  
幽壑皚皚舊覆深  
鍾罷花奴來喫飯  
詩成木客與和吟  
存亡十載浮生感  
山月曾無異古今

花下待蓉城不至

嘒嘒啼鶯林畔經  
翻翻戲蝶墻頭停  
綠樽風吹酒浪濺  
人間日斜花冥冥  
悵望君君不見  
直到衣衫映春星

僕常謂暑熱雖苦  
夕涼單衣引眠風  
軒其趣非煖帳斟  
酒可能相方蓉城  
貧士而韻者倘知之

乎率吟奉質乙酉夏五之廿有七夜

低斟燠室借薰然盡道冬寒勝夏天何似黃昏初褪  
暑風牀坦腹細探眠

憫旱

又是淒風散薄陰火雲亭午赫曦臨可憐野外携鋤  
子延領瞻天作底心

警婢

三食飽魚肉尙嫌廚具貧熱炭不猛遽生嗔治蔬乍  
硬便坐嘔若要見爾笑不呻當須炊玉桂作薪嗜慾  
如海水無濱桂玉久將不見新天幸爾雖婢子身猶



得供奉宰相人去秋禾稔溢倉囷今年麥熟八方均  
斗米三錢送窮春誰復區區食紅陳昨日携藜過前  
隣屑青爲粥僅沾咽

述旨

大抵視人術理止別賢否矧處子弟間情可異薄厚  
獨恠左海陋人生先視母均是天倫親相懸如壁阡  
謂重名分故實貪仕宦取仕宦傳家遠豈比詩禮壽  
詩禮飾其躬美踰腰拖綬拖綬方作士漆雕誠魯莽  
我常思昧昧惡俗沿襲久私見浸晦盲遂忘性所有  
哀哉壞倫事量之不勝斗羅列侍膝下多少已冠首

恬然對萬目自稱爲無後忍割劬勞顯甘心螺贏負  
強溯一源論血脉同脛肘曷如身分身相傳以相受  
一文不敢盜他家任貫朽饑寒縱到骨固窮期死守  
阡陌田連亘未見讓半畝燒雲或耕石胼胝僅糊口  
良非物非主取與不可苟賤物貴斯人前聖矚分割  
云何繼序地馬牛風不醜嗚呼孰從明人各畏其婦  
畏婦復貪仕骨肉如弊箒千載識斯言除是起魯叟  
夏日同洪季臨赫携一客訪寧野戚弟徐穉秀

俊輔

江居君素亦卜其隣

隻衛雙騾出郭俱行尋魚市轉倉衢入門便已清風



有臨水全然暑氣無  
島渚沿洄雲乍霽  
杯盤狼藉日方晡  
多君共決江居卜  
愧獨吾亭鎖綠蕪

秋曉聽雨

雨師誠叵測  
心不與人平  
溪澤常無跡  
要乾却有聲  
田功收可見  
天道損斯成  
伏枕懷憂國  
孤吟自徹明

秋霖

秋盡猶蒸熱  
霖霖竟若新  
虞憂深蔀屋  
措畫急藩臣  
物賤那無貴  
災生必有因  
老經人事慣  
不待驗星辰  
恭和 睿製  
晬日頒詩之什

衣光食德仰高宸  
夏沐恩波 少海春  
每懼家人推

燕禮欣逢弧節荷鴻仁龍廻天闕騰成勢鳳和雲韶  
奏有倫拚罷瓊函何所報重華令聞祝休臻

李泊翁適至與石閒匡山蓉城用劔南詩韻共  
賦

泊翁綺語似雲和秋後吟詩激楚多昌谷當年誰並  
峙玉溪今日有餘波晶瞳轉碧星將曙雙頰流丹酒  
半醅歲暮人間知己少榮期牧犢合成歌

禁酒

先甲頒條令清秋奉簡書畏同山有獸憂甚食無魚  
醴設昔徒爾礪澆今奈余可憐溪上老齋坐太常如



近體奉寄黃岡使君六十一歲庚席

向來書札却何云此日情懷我似君  
甲子同回憐比月參商不見恨停雲  
白門葱竹前塵宵黃館笙簫卽事紛  
欲叙相思兼祝嘏蒼葭秀菊湧金瀆

玄巖次蓉城寄示韻

浮嵐環翠宅之中巾屨蕭然有古風  
但喜青山隣謝朓多慚綠野臥裴公  
採來籬菊催芻酒刈了田禾課種楓  
明日如尋京洛去迴車阮步又途窮

夜坐拈唐人韻

挺林之會泐溪灣荒陋吾廬數十間  
春色桑榆畊者

畝秋香杞菊採于山地鄰先壟三飡返書走京城一  
宿還如此便宜歸未占白頭吟望暮雲閒

次道根共諸客詠月韻

但願不違人長如望與旬平生看未厭此夜愛逾新  
流照非專及靈心似獨親若爲携羽客飛上廣陵津

金生拈韻共賦

身分無時永有閒暫歸猶幸近名山堂前老柏雲千  
樹林表寒溪雪一灣聊遣兒孫知素性寧能丘壑駐  
衰顏機緣漸熟方便路只許庵僧日往還

夜寒



夜寒知歲暮風雪臥荒廬漠漠千山積寥寥萬竅虛  
憂長須死已髮短念生初誰謂莊周放低頭亦著書  
贈靈源菴致鑑上人兼示諸禪

山半孤菴結構新登臨閒殺遠遊人莊嚴迥露諸天  
相蕭灑超離下界塵栢樹參庭還見性蒲團一坐可  
通神云何脫却多生業此地逃名又養真

玄墅臨歸寫竹扇面仍題絕句與鄭生濟鳳  
愛爾才思稍出羣潛居詞賦要凌雲天寒野屋無堪  
贈不覺臨行寫此君

雪夜寫竹

一節高如一節抽雲霄不上未應休寰間卉木知多  
少獨寫琅玕到白頭

次李天民梅花詩

生意央央鐵榦籠碧紗窓外漫酸風騷人自醒蓐騰  
醉奇馥何緣在鼻中

話言安用費炎庖寂寂相看雪後枝究竟胷中無點  
墨妙香疎影是真詩

皎皎期親落落情香消燭跋到參橫誰知姑射凝神  
妙一是無爲化自成

許子當年冠素冠生涯枯淡一廬安龕中玉貌殊相



似不戀春光不怕寒  
似蘭斯臭玉如溫  
香色同歸不二門  
冰雪何嘗輸雨露  
皇天后土有偏恩

哭石閒

狸首斑然奈若何  
心知慟哭不如歌  
一回灑淚柴門出  
怊悵寒溪有逝波

題東寧都尉西軒

往跡今來覓西軒  
似夢中老梅槎欲  
枿穉竹葉猶叢  
壇地新亭起垣門  
舊沼通欣然還有  
失人事固難窮  
次柳伯教除夕韻

文字起無形神運境乃至讀君除夕詩宛然獲人意  
幼恨青春遲晚向黃昏易誰不懷感慨摸寫諒難事  
先朝四檢書令尊居其一清恬篤儒風文華稱名實  
君如瑯琊家臨池敬追逸紬書有妙思寫情無劣筆  
余與令尊好中身自少日詞盟未卒業母亦待君述  
白首諗舊遊悽愴中情溢

用華人韻與客賦春草

無情解斷有情魂目極春原綠一痕雨雨風風年復  
歲綿綿蔓蔓子生孫自是東君偏借色何曾野火並  
燒根梁公桃李還多鬬爭似當時仲蔚門



晴日射的

撫弭忽淒涼前塵憶射堂錦袍迎日彩仙仗繚雲光  
擎帕恩頒重沾觥罰醞香如今雖拙手忝耦侍先  
王

題書花之室

房外添房僅半間書花之室寫楣顏閉簾籤帙香生  
架開幔叢英爛映山尙友不知千古遠尋芳贏得四  
時閒若云二者猶多事高臥藤牀謝往還

驢死

人畜生相與哀傷死可無當年來駿骨萬里別燕都

急病緣勞久長鳴有絕殊東歸應見塚爲汝奠青芻

玉泉庵

春山濃似畫草木暎人衣黛石籠新綠金流碎麗暉  
菴危支佛力地僻合禪機每過心仍慣欣然自忘歸

次蓉城寄示韻

家無甌石况年飢烟火窮廬出每遲梁肉若教供滿  
腹恐君還少苦吟時

挈家眷歸玄巖新舍水陸分路而行

平分眷屬向驪州一半轎行一半舟陌上晴乾風勢  
利不知誰先抵家休



途中卽事

新秧出水細於鍼宿麥連雲嫩似金  
驀遣行愁銷得盡宣城楊柳碧深深

宿芥村池舍

韓公假筆自爲聲春鳥秋蟲摠不平  
我宿田家思續語天教三夏以蛙鳴

入舟

晴山眼注郭熙畫騷客手繙王建詩  
却舉匏樽酬好景舟行何迅不如遲

釣魚取適玄真子籠鴨能言甫里生  
一世詩名俱碌碌

碌爭如宮錦去騎鯨

二水頭曉起聞雨

水站晨鷄喔喔鳴孤燈猶自背人明  
牕間輾轉思詩料却好疎篷聽雨聲

行船

江沙淺白不成潭峽水深青欲謝藍  
雨歇楊根風力緊黃昏應泊郡門南  
高浪津夫認作情錦鱗穿柳遠相迎  
褰篷一笑誇風味巨擊其鮮細咤羹

下舟入香谷



京邸尋常日月還桃花紅碧尙韶顏却來江北看風物麥穗含金雉子斑

通天至孝此佳城祖考之墳伯父營一木兒孫心敢慢貧時匍匐手栽成

晨起登樓望瑩域有靈應復此身臨此身已老無他戀后土皇天可証心

屋容妻妾已恢恢田園林池亦具裁一日歸休誰復禁白紛袍笏久徘徊

百步其周一丈深魚兒作隊泳還沈悠然飛入趨山

影日落林空更可心

小池

僕婢欣欣及四隣吾行聿至麥秋新縱然不見園中

灼森翠濃濃却賽春

玄巖

長湖院界畿湖交土沃人稠習俗淳試覓燈宵遊讌

跡勾欄高出綠楊梢

長湖院  
下全

門壓長橋檻暎湖主人優勦助賓娛自言吏退閑無  
事臨水聊開賣藥舖

過溪村見桑者

窈窕溪邊屋麥穗搖青空塍間有樹桑桑上登老翁  
閒閒摘沃葉盈掬投筐中時時望行人自若理所工  
我亦望之過欣然悅其風安知非其人不如龐德公



山丁送桃實與穉秀同嚼賦之

驚喜山籃至有蕢園客收賞花如昨日食實奄新秋  
丹渥真難老芳香詫少儔勸君恣情喫此果近仙流  
螢火

幾隨腐草此生休那得光輝個個畱借翼幸蒙天地  
力非烟不作雨風愁提囊冷士歸書屋撲扇佳人掩  
畫樓酒渴五更回睡睫殘星數點掛簾鉤

次沈孝田聽雨見懷韻

秋霖判失小民依子遺其如命式微魚鼈將聞平地  
產螽蝗更見刺天飛綿田花落工機廢菜圃根消旨

蓄稀誰與 聖朝張國計苦吟無力解愁圍

淫霖溽暑近年無何處清涼着病軀跳蚤攪眠捫不  
奈飛蚊嗜血苦猶殊王生習靜耽觀槿惠子忘言愛  
據梧憂樂經來都一瞥悠悠人事視甌臠

秋懷二十一首

并序

秋者歲一有之氣是氣也感人易悲自余生  
乙酉秋經今丙戌總得秋六十有二然及秋  
而知秋之能感人而知悲秋者自十七八歲  
始悲秋而能託之詩者年數亦相似大抵近  
五十年秋而不悲悲而不詩殆無歲而或然



今秋多雨感人既甚余亦善病竊自念已老  
秋之感余無幾年悲能託詩者隨當無幾篇  
悲至於此亦已深哉偶於石南樓中閱少陵  
五言近體押秋字者爲二十一篇將和之以  
泄其悲未竟而歸鄉廬足成之命曰二十一

秋詩

傍昏還急雨悄坐藥欄頭潦久如揮客思深每引愁  
蟲音連燥濕魚戲或沉浮出色憐新蕊紅羅巧剪秋  
已息功名念寧忘汗漫遊有身元是患無處不關愁  
守屋仍三夏思山又一秋閒雲經碧沼孤影詎長留

此世紛紛事榮枯草一秋不虞寧已與索性異人求  
閱歷稀青眼飛騰謬黑頭所嗟書卷裏前聖有遺憂  
慟哭疎眉老論交四十秋謂君似貞曜期我過蘇州  
異巷思聯室同心願獎裘幽明翻一隔孤陋抱長憂  
日逐紅塵內棲棲忽早秋出山稱小草將老憶菟裘  
業窳生何樂名湮死亦憂靈心猶自警八極每神遊  
昨我經周甲人間願已休餘生聊自在不死亦非求  
老重妻兒對閒耽翰墨遊佳花栽石畔定看幾春秋  
西風吹雨斷天地杳然秋已分辭單葛應須備熟裘  
澄江遠伏枕明月廢登樓獨有多生癖蟲吟共未休



一片賞心事紅亭對翠樓武夫揚桂櫂官妓鬪金鉤  
席上長卿簡營中叔子裘衰翁能再得渭上正生秋  
亦知思不了寧忘臥驪州素髮三千丈黃塵四十秋  
涼生窓外竹山入雨中樓笑爲今人謝休疑尚有求  
自道堪何事蕭蕭鬢髮秋詩書違卒業江漢滯歸舟  
心折菁華竭身隨歲月流回憐歷塊馬爭及弄波鷗  
峽松生菌美新餉自東州肌潤牛郊雨香含貊國秋  
晚菰那比品春筍定同流一飽忻然起題詩散病愁  
丁丁生子響簾簾入清秋汗漫思彎繳尋常致覆舟  
機玄簷下聽跡幻橘中遊勝敗何干事斜暉已在樓

那看帶錢客跨鶴上揚州待足知何日多悲又此秋  
大道三杯酒清風五月裘終然榮利外尙得姓名畱  
烏兔無停趾吾生可久畱鼎砂虛引歲庭柳自生秋  
才謝張蘇筆名慚郭李舟公然成白首怊悵倚高樓  
清妙蓉城士良非俗客流與人無設畛干祿亦虛舟  
色雜安仁鬢毛希季子裘怡情忘顯晦社火六回秋  
野屋蕭蕭雨空催栢樹秋還鄉疑作客望遠恨無樓  
誰辨隍中鹿都忘壑底舟世情今濩落回首憶狐丘  
歸鴈當何去冥冥萬里秋雲翼風前厲霜音空外流  
任渠方得意令我却添愁悵望澄江曲青山繞客舟



欲尋丹峽者問路必忠州盡日驢徐踏便風舟暫浮  
致身元自易搔首奈如愁賢從空懷約遲遲再送秋  
伊昔凌雲氣哀吟怨禿頭乾坤安所迫人世此同浮  
畏影猶趨日勤菑未見秋雖然文采短亦不慕曹劉  
偷桃王母客曾下漢廷遊玉貌聊驚世金門似閨郵  
折姦宣室日諫獵上林秋千載空相望蒼蒼木宿留  
星隕悲諸葛身殲五丈秋一窺炎井熾八陣鬼工愁  
摯尹心相照夷吾器未優報君師表在殉國况箕裘  
丙戌季秋宿欣涓館作

山館秋正晏菊秀蘭已萎鳴澗寂無音落葉堆殘水

掃葉淘其清頰面復漱齒跂石待高僧寒雲拂袖起  
我來此地眠不知曾幾度常多酒食困蓋挈凡人故  
青燈對枯禪疎牕集霜露趨向雖異途所悅同所慕  
晨興陟高阜延覽衆山嶺合還復橫袤竦然出渺靄  
若欲作平地應須翻大海僧言人壽短此事不可待  
丙戌初冬初六脩禊作

山色淒淒水氣寒初冬牢落九秋闌林楓和我皺衰  
相籬菊笑君懷冷官眼底糟臺須但築胷中墨瀋已  
全乾鉢盂強作今年會哀死傷離爲緒難

贈別上使洪仲深

義俊



綴筆瀛洲使轄膏世承專對不辭勞東人已賀裘傳  
冶華士當知鳳有毛薊樹寒烟天外色金臺曉月雪  
中高殊方得意交遊在日鶴雲龍政幾遭

別副使申翠微

六十年前洪湛軒潘嚴陸暨死生論君行若晤南中  
士爲問三家有後昆

三絕張生古未多天涯淚盡奈伊何當年酷愛東人  
士一派今誰接逝波

續夢無緣老海隈前塵影裏憶金臺書生不及鴻臚  
屬猶得年年走一回

楊僉樞澤九有書相問遂贈以絕句及南菓十枚庸答前秋壽詩之惠

混混詞源倒峽飛優優天爵服緋衣分將嘉實君知否西土君如此果稀

與社中人共賦

高燒銀燭照書牆梅影橫斜惜夜芳病是閒時那怕久名惟飲者可圖長需材欲貯籠中朮吐氣皆成座上香聽徹隣鷄歡未了碁樽狼藉玉山傍

水仙花

方丈仙葩秀出羣玄冬抽葉綠紛紛羞從衆艷爭春



雨任是高情托水雲羅襪凌波驚子建白頭如雪怨  
文君夜來却伴梅兄宿香色都無兩可分

夢得一聯朝起足成丙戌臘月小寒也

夢裏適何處醒來詩句誇馬行春樹影僧立夕陽家  
真境森猶記他時恰不差寂然聞暗馥床有水仙花  
待義民不至

每日朝來復暮來朝來不至爲何哉應緣破褐衝朝  
冷却被山風吹遣回

夜爲墨戲傍人爭取之漫吟長律

柔毫飽蘸雪牋明亂寫唐詩到四更手軟何能追古

法身閒聊自寄歡情燈前笑見紛拏影窗外喧聞窸  
窣聲多癖於吾忘巧拙且畱餘軸待君成

除夕

此夕怱怱及歲除燈前嗒坐意何如亦知添齒無妨  
事堪愧逾多未讀書



楓皋集卷之六目錄

詩

壺舍與社伴共賦

出城

丁亥春日思石閒灑淚賦此

野店

芙蓉壁

示同行諸伴

島潭

書呈清風族叔

龜潭蒼壁 三首

守一菴

過興元

舟中拈唐人韻共賦 二首

放鼈

寒碧樓

西倉舟中

彈琴臺弔古 二首

下仙巖

次柳上舍舜瑞 興慶 上仙巖韻



清風趙使君

吉源

再疊寒碧樓韻見寄遂復次

答之

贈關東伯鄭善之

禹校弘鼎以柳杏來餉謾賦古體以贈

西阜送迺根還京

玄巖曉雨贈鑑上人

東宮邸下以 睿製下示令賤臣賡又令別製古

詩以進甚盛事也臣承令伏讀藻彩溢發格調

工妙欽仰讚歎有不能自己謹依古人因事獻

箴之義恭賦一篇庸備 离明之照臨

切莫

夜坐偶吟

離羣

山居卽事

二首

送別金士鴻

鑄

東萊赴任之行

次蓉城都事冬日見寄韻

送李仲睿

愚在

副价赴燕

梅下曉作

出東城

漢津與諸公共賦



迨根重修稼齋先生舊第喜而賦

樅村田舍復次前韻

觀鷹獵

石郊歸路漫吟書與諸益求和

金園賞春用草堂韻

蓉城有句云春日偏思柳間庵遂足之

舟橋調馬

大殿樂章

省墓

歸路有懷李令穉成

魯集

賦此待便投寄兼乞

璫報

舟中寄呈李明府

二首

夜雨次韓致堯韻

青石斧硯歌

秋生

江村雜咏

三首

答李可用

潞

和陶韻

傷逝

恭奉

睿製頒橘宮僚詩敬賡

喜蓉城病起



題唐筓寄再從弟太卿

初淳

南至前日

山居春暮

讀畫

書便面贈人

步月率成近體呈沈孝田

壺舍共賦

屋後有石半入吾屋半屬鄰家將斥其垣或疑

巨蛇穴其中遂賦此

書贈金宇夏

有懷李天民禁直

寄孝田

又拈坡公韻

重陽獨上孟園

申生匡一宅會賦

玉壺精舍與諸生同賦

客去獨坐無聊

次蓉城人名雪詩

觀技

路上聞三藐寺冰溪難越



閨梅

上元夜自玉壺赴社飲過苑署聞淵泉與諸文人飲明日賦呈

吟市社中諸人

贈孝田

郊店遇體一上人率贈絕句

勸柳伯教復膺檢書兼任

戲題自寫墨竹

次蓉城韻

出郭

山晴

贈致鑑

送圓明上人還山

還京第途中與再從弟士倚

蘭淳

共賦

過北城外桃花已衰

桃花洞贈蓉城

題畫扇

率吟書尹彥國

命烈

扇

送蔚山牧官李天民

瓦沼栽荷次韓文公盆池韻

三首



觀古東李

翊會

便面書戲題

壺舍映山紅盛開

孝明世子挽詞

六首

悼石閒

賀問庵六十一歲生朝

與方承圓

次蓉城見寄韻

澄泥硯詩

飯罷信筆

贈友人

憶故驢

次孝田韻

園鵝伏卵幾三旬而鰌率爾戲賦

溪上晴朝

李牧官天民自藍田至共賦

花樹亭

溪屋卽事

次李天民東京懷古韻

拈杜韻共賦

聞蓉城新卜鄉居率吟贈之



促織

次李天民七夕韻

昨夕意有所感謾成短律

早秋憶中浪田舍

次東坡韻感秋

山屋次李天民韻

花牋

答張混賀晬

次道根韻

更次

曉起疊前韻

壺舍前阜早望

擬古兩頭纖纖詞

近體一篇送上行人鄭經山

送人之燕

夜起咏牀梅

臥雲山房示李天民

水仙花

寒食

踏青前夕值雨宿北倉謾吟



次人遊洞門韻

與寧野出北渚同吟

二首

白杜鵑

山館書感

階下竹

柳齋集

卷六



楓皋集卷之六

詩

壺舍與社伴共賦

新年鼎鼎二旬經管領春思坐小亭梅雪前宵鋪地  
白柳烟何日鎖塘青禽如穉子言初學山似佳人睡  
半醒慚愧老來虧筆力不成摹寫肖形形

出城

夙戒巾車向艮岡桃花艷彩最朝陽同君視蔭流年  
短任我行春鎮日忙家裏飯成拋不喫城隅酒薄買  
還嘗醒脾只是須臾味猶謂河豚一死當

丁亥春日思石閒灑淚賦此

春自再歸人不歸北山芳草空菲菲埋因醒宿倘長  
臥悲到淚乾思奮飛哀我踽涼今獨在似君奇絕古  
真稀遺嬌饑病誰相問寂寂東風掩舊扉

野店

朝出興仁門却望玄巖庄六十三歲人寧誇筋骨強  
一百五十程不亦阻且長昨來何疾疾今去何遑遑  
將無道傍觀指點疑余狂狂信未容易非狂故此忙  
浮世本擾擾人事多穰穰造物偏愛劇可臆不可詳  
不見逐風蓬東西南北方停車入野店門對小土岡



松櫺自成籬細雨着烟光支枕暫頽然主人供炊梁  
春夢久已醒一笑爲飽嘗

芙蓉壁

灘轉沙開峽勢回官娥曉事勸深杯風光未了芙蓉  
壁又過桃花洞口來

示同行諸伴

阮籍胷中無俗物將軍揖客有名儒吹笙載酒飄然  
去若遇眞仙定與俱

島潭

鬼鑿無痕尙有形隔山呀處透天青舟來舟去開還

掩石闕千年不用局

書呈清風族叔

笑指澄江別與君君看此水萬波分  
原初太白涓涓滴一派遙從積石雲

龜潭蒼壁

題詩玉筍峯濯筆丹江水纜索引夕陽清風吹未已  
層壁立如削顛松亦百尺若有吹笙仙應來月明夕  
壁下有泓潭淵碧不可測請君莫投石恐驚神物伏

守一菴

剡木引山泉山廚鳴似雨誰知飲餘水去救農人苦



過興元

中原山色望中賒春盡江南不見花出水秧鍼憐細  
細翻風燕子喜斜斜綠楊堤外騎驢客芳草橋頭賣  
酒家行抵故人應未暮勞勞鞍馬不須嗟

舟中拈唐人韻共賦

堤高芳草近晴天樹密漁村上晚烟藉汝長年工涉  
險饒君千首思騰泉笙疑鳳唳調金葉酒憶鵝兒瀉  
玉船多謝西風遙送帆分明來日泊三仙

辛苦曾穿幾峽來榆花灘上又驚雷進篙力用平生  
盡返棹心知半日迴垂釣應多羨魚意虛舟亦是濟

川才行行漸近仙岑界回首紅塵一念灰

放黿

龍子將無魚服來舟中筮易雨承雷忍令魚臙須臾  
具却許滄波快活迴解網吾猶思聖訓成橋人謂有  
神才世間憂喜多如汝幾度昆明見劫灰

寒碧樓

越絕澄江巴字流清心樓外始登樓天開漢上千重  
峽地勝湖西五十州雨麥喜堪聞早夏霜楓恨未見  
深秋吾家於此多先躅落日徘徊畫檻頭

西倉舟中



峽宿知風自舟吟忘日過樵兒輕虎豹漁父傲風波  
暫喜危灘少還愁好石多滿江烟雨裏悄坐意如何

彈琴臺弔古

傳言古仙人此地弄琴曲曲終去不回江空山翠複  
我來江水淺草萋露沙礫相携暫徘徊危磯繫剝木  
慨余忽屢歎非爲渺靈跡嗟嗟我宿將龍年死校敵  
輕身祇有心惡戰豈無力偶一濤斜轍未再淮陰績  
超石怒未洩冥然赴深碧誰塞文吏口長慙壯士腹  
成敗卽天運雲仍由善積焉知此日死功不下重廓  
悲吟弔雄魄灘聲增惻惻

劒門天下險未截陰平曲使智不如福無賴山嶺複  
不能具真眼何以辨璞礫不知揣本末岑樓齊寸木  
耳食貴常談淵膝輕執跡羊戰類童嬉毆市非狼敵  
芻豆許不與驥騏安責力廟筭此茫然越視同忌績  
人生孰爲大殉身答穹碧乘駿嗥門前繫圈出魚腹  
二事豈徒爾諒由精誠積我遊適此地江山倏悲廓  
尙論不原情生性所悱惻

下仙巖

下馬下仙巖溪流潺湲人言此溪流源發太白山  
古昌邑茲山先祖鄉其間一自仕宦顯累世不知還



我亦生 王國遂老鵷鷺班有時睠茲土燕越絕相  
攀不意聞此言心惕喜動顏我思此水味先祖飲之  
嫺人生稟水土血脉如循環飲我先祖飲神理必相  
關酌言飲滿腹一洗我愚頑更思從此去不踰百里  
艱安得謝塵累祖鄉爲民閒

次柳上舍舜瑞

興慶

上仙巖韻

古來山水云勝者必以石無石卽庸常有石亦貴白  
三巖皆石勝大抵與凡隔下仙類崛起不屑爲衡尺  
中仙頗矜飾文物有朗闢伏惟上仙巖細斲兼鉅割  
鬼工畢智力發洩不復惜玉是昆吾刻雪從太始積

靈妙眼爲眩恢宕心共適我願囑仙曹毋輕混塵跡

清風趙使君

吉源

再疊寒碧樓韻見寄遂復次

答之

千疊山圍錦繡屏使君端坐對雲汀訟閒盡日稀開  
印吏散清風自掩櫺殊績亭樓顏已換豐碑父老口  
先銘堪嗟遠客思歸切虛負高情促解舲

贈關東伯鄭善之

歲丁亥維夏四月經山學士別余曰賤臣敢力辭湖  
南負犯逋慢甘當罰 聖度包荒大穹昊恩波重疊  
深溟渤誰道將罪反媒榮往欽關東承倉猝匪才前



後諒一身荐煩惱懣嚴鉄鉞黽委蛇肅寵命晨朝  
奉節辭金闕乞言贈言古所重公乎母慳示津筏余  
笑啞啞捉君腕我思不俟君言卒藏貊故墟何茫然  
枕海阻山如百粵氓如鹿豕易駭竄土無膏腴宜墾  
堡燒雲鑿石終身苦裳布不掩飯不帥浦港生涯奏  
鮮食蚤人烏鬼共怱惚鬻妻賣子供不足徵求常棘  
底殄塲君往勞來心定畫余坐領略口猶訥譬則君  
將斫巨鰲區區我方味螻蟻不言何損言何補君效  
分憂但竭蹶別有一事欲溷君側耳切莫笑疎歇天  
下名山三十六古來華人盡揚挖金剛獨漏名山記

版圖之外堪咄咄我未曾見聞如是此山無膚惟有  
骨想像造化設此山精殫巧畢勞矻矻大抵三百里  
周圍一萬二千峯嶂岫或如出水濯芙蓉或如滿床  
插牙笏或如古佛弟子俱或如真人上帝謁或如雲  
外擎寶幢或如波間曳羅襪矗如廉利立蛇矛列如  
編伍比鮫鰓喜如天女散優曇悍如將軍臨戰伐聚  
首而俯如合謀戾背而離如相艷張爪蜿腰如龍挈  
植蹄垂鬣如馬齧旖旎如旗展錦繡縹緲如塔湧氛  
埽皎皎如照夜雪暈蓊蓊如噴香烟醇或蹲獅象虎  
鹿兕或翔鸞鳳鶴鸛鵠最是毗盧頂摩天壓臨鯨濤



之洵汨東望扶桑三萬里似指掌紋看胸臆峯形種  
種莫有同視爲之眩心爲憚爲壑爲洞爲邃谷凹凸  
因勢異現沒山泉得石狀千萬爲潭爲瀑爲陰窟散  
爲澗溪合爲川紆回曲折穿脩樾水光可遣阿蘭籠  
石色恐教卞和別最是九龍淵特壯雷霆噴薄霧雨  
洙觀者神懣氣沮索逡巡思却行勃窣山中山外幾  
寺菴昔之興者今或忽槩此山奇石所爲撫實魯秋  
與楚杙此山經歷羅麗來始遇楊公慳秘發旁祖淵  
翁七作主長使家烟不黔垓二公去後寂無聲俗子  
冗人謾墮突我自塵緣似窮鬼驅之不去長相拌夢

攬烟霞身不動僕夫痛矣車無軌今歲明年迫老死  
胃間痞結吞糠粃知君才器超等倫詞賦煥爛稱華  
閥此去逢秋楓始丹翠憶遙遙踰斷髮初地携僧業  
鏡臺仙區止觀埋香碣搜窮剔幽無遺憾萬丈光燄  
筆高揭永州之記南山詩方駕韓柳力誰竭但榮刺  
史擁簿墨何異書生坐兀兀君當爲我吐礪礪我愧  
贈君蓄洩勃

禹校弘鼎以柳杏來餉漫賦古體以贈

品杏亦多類最珍插柳者酸液帶香甜濃肥殊凡瑣  
刺齒醒脾慢味觸有爽雅樓前立兩株春寒花裊娜



英落吹腮雪藥結載跗赭青青雨所濡磊磊葉並彈  
頑童肆攀折黠婢巧叉打未熟半先失防密奈伺情  
今年誰剝盡兩月滯鄉社鄉社但桑麻一望百里野  
在在松栢栗行行列籬下柰萸尚有名絕不見此菓  
此菓非土宜不見理則那端居艸襍事縮項摘書坐  
烹葵攤炊麥三食腹常果是日妨肺氣饅懣少清灑  
晴雲映碧落和輪迫大火蘆棚蔭何得歔吸擁爐冶  
妄願寒門租漫學青林裸蓬蒿祇謏舌潤喉卽不可  
莼煎云生津澀性煩反惹望梅渴詎止倉卒眩真假  
千秋想卽境子誠奸雄也同時若同行和余術中墮

顧與二客道閨堂正歌歌忽看舊部曲門扉來繫馬  
屏營歷階趨磬折前拜我起居畢數語長跪獻苴裹  
節屈熟向嘉路遙致患寡受言席上傾三五十團顙  
似頭波染鴨疑頰砂點姹姁物忼天降心亟口還啞  
詎忍便咀嚼摩嗅不能捨雖則未便咀嚙痒涎垂哆  
驚喜及傍觀瞬動顙復朶舉手謝慙懃情踰貝朋荷  
邇來我所思賴汝以憂瀉勸汝青精飯酬汝黃金罍  
區區懼未愜祝汝綬綰銙抵斗庠銅錢涼燠適渠厦  
康直命如山繩蜚弄璋瓦豈爲口腹故文采費揚簸  
投瓜報瓊琚感深辭自妥旣禱始快嚼其餘送蘭若



戒僧善種核食實期無左呼燭動高興箋拭柔毫把  
浪濤勢翻騰長吟一氣寫

西阜送道根還京

送汝西原上翻吟陟岵詩眼窮猶自跂心亂却如癡  
誨義慙無素希賢望過期我家規度在憂國卽天知  
玄巖曉雨贈鑑上人

我爲肉食者師是壞衣人爲道旣不同相悅亦何因  
我亦不自知師或涉迷津淒淒柏林雨夕話到鷄晨  
師今五十九我已過六旬結菴計亦晚當復享幾春  
一時山澗聲滌盡萬古塵

東宮邸下以 睿製下示令賤臣賡又令別製古  
詩以進甚盛事也臣承令伏讀藻彩溢發格調  
工妙欽仰讚歎有不能自己謹依古人因事獻  
箴之義恭賦一篇庸備 高明之照臨

重瞳戒弼諧勅天大無外大風感隆準英音滿豐沛  
聖賢厥言志天下孰載蓋三千遭魯叟一存九刪汰  
闇然錦尚褰絢兮素先繪一言蔽無邪四端隨見藹  
興羣契物則敦厚絕淫恣所以詩教盛能參造化大  
恭惟我 儲聖毓玆文明會蒼邸養潛德重光麗瑞  
靄嗜好篤墳典滋味比炙膾賓僚視良友講習象澤



兌英華發彤管天香流醴醵手札頒寶軸荒廬夜將  
艾驚喜捧弘璧跪讀整衣帶賡和忽承令朽材真狼  
狽多知推問寡農馬豈狡獪三復又九頓願忠老未  
沫憂明古之義戇忱獻無害施鉛失天姿刻羽非靈  
籟月露諒可怡離實亦其奈吳季昔論樂請止自曹  
鄒淳漓判不侔治忽瞭著蔡况乃帝王辭近道美爲  
最觀水當觀海登山必登泰皇虞信尙矣漢業猶藐  
蕞 睿思一溯源萬世庶永賴微蟲鳴苦心殊愧朝  
陽翮

切莫

切莫歸程勸趣開忘歸奚啻一端纔晝陰有柏思非  
夏宵寢無蚊耳不雷安得老妻仍共挽却憐穉女未  
同來樽前屈指平生事雙皺低眉始暫擡

夜坐偶吟

雨亦無端霽不期高樓畱客合傾卮風天乍動芭蕉  
色月地紛交竹柏枝清坐破眠涼自足苦吟圓句夜  
俱遲流光已過初秋半悵望鄉山竟若爲

離羣

露重宵光切風輕暑氣分細簾新有月碧宇更無雲  
蟻泛停杯見蟲鳴隔壁聞良辰元易邁况我久離羣



山居卽事

不分朝暮四時間環得吾廬是碧山每值清秋成獨  
往幾逢明月許同還名泉勝藥通靈性癯石如人對  
醉顏倦鳥孤雲誰竊比羔裘退食亦蕭閒

經邦聞道愧初心老悖何妨臥北林竹帛芳名勞夢  
想巖溪漫跡足光陰編詩篋裏應千首種柳門前已  
數尋西蜀子雲良苦癖寧期後世有知音

送別金士鴻

簪

東萊赴任之行

北極山之宗南窮地之委三年再遠役王事亦勞止  
念君隨宦跡有如萍吹水萍與水何親風來卽偶爾

但玆頭白日言別諒可已狡蠻館我溼餽廩二百禩  
何德昔相酬廟畫謬如彼至今壯士心熬煎欲悶死  
君登沒雲臺鯨波三萬里波間有列嶼對馬如黑子  
應歎國無人足爲天下恥

次蓉城都事冬日見寄韻

捱了牢騷竟若初天寒吟病怨離居唯逢馴鶴深窺  
戶獨遣疎梅冷照書此日徐君遲解榻當年曹孟痛  
過車鉢盂縱會山房雪祇是雷歡昔不如

送李仲睿

愚在

副价赴燕

自崖而返雪飛飛楊柳遲遲待遠歸貳使銜尊三品



選九州思博一身微燈寒玉館難祈夢風暖沙河始  
減衣娘子山前家報喜噤噤雛鳳聞香聞

梅下曉作

萬事非關病不能衰情日覺失飛騰行藏倏倏亡羊  
客用實悠悠畜馬僧囊底都無餘智叩卷中唯有古  
人憑偶然梅下同君坐閒就新篇對曉燈

出東城

試踏東郊路輕裝曙日初營菟心舊賞出弔病新除  
殘雪棲陰澗繁霜被曠墟衝寒裘未着吾事笑常疎  
漢津與諸公共賦

寥落冰江夜向深沙頭列坐更長吟  
七分明月三分雪冷盡浮生紫陌心

道根重修稼齋先生舊第喜而賦

稼齋高祖弟敬愛亦猶孫屋老寢將廢兒能圖復存  
典型因古昔修潔及池園凡世興衰事家邦不二論  
樅村田舍復次前韻

冉冉稼齋宅旁生竹有孫將多經始志猶及典型存  
間架琴書屋脩明杖屨園晚來增感古景物且徐論  
觀鷹獵

遠縱愁胡目窮看野雉逃半空身忽決一擊勢何豪



雪裏塗殷血風前碎錦毛千人呼快絕喜不爲充庖  
石郊歸路漫吟書與諸益求和

驢足輕而穩蹢蹢催步聲晴暉沙不凍殘雪嶽逾明  
自異裨謔適偏深仲統情居然庄樹望墟里晚烟橫  
金園賞春用草堂韻

策杖春風北洞尋雲嵐拂面半晴陰入樽花氣醒神  
細出谷鶯聲砭俗深絲竹何干脩禊事冠童猶得詠  
歸心百年讌樂須臾境畱與斯園永姓金

蓉城有句云春日偏思柳問庵遂足之

春日偏思柳問庵風流文雅古無慙城西破屋連芳

草身外殘書一綠函  
貧自鳳毛傳舊物窮猶麟角長  
奇男今人可語誰如汝  
貽阻花前悵不堪

舟橋調馬

天門振策出王良  
天駟星騰漢水光  
霧鬣風含依鹵簿  
電蹄雷發蹋浮梁  
東封雲錦唐家富  
西極龍媒漢帝祥  
更憶瑤池休八駿  
祇今畱與畫圖長

大殿樂章

高高惟天穹  
冒下土載厥生生孰聞而覩  
穆穆我王儼思則之篤恭  
久道裳衣其垂帝眷克肖  
錫無疆慶文子文孫承承駿命  
萬稼攸同百工是式於千



億禩不顯一德

惟天一章章十六句

省墓

我來何所覲淚灑若堂封域樹春風發原莎露氣重  
天其藐孤相地許吉人逢曷日茅菴結瞻依夏事農  
歸路有懷李令穉成魯集賦此待便投寄兼乞  
瓊報

幾度吾鄉把袂時從無跌宕此番奇樓中跋燭聯宵  
話江上停舟兩日詩趣想清閒非昔昧風流蘊藉更  
今知自憐未遂歸田計長與君深別後思

舟中寄呈李明府

汀洲楊柳碧沉烟別緒江流兩渺然更揭篷窓回首  
立使君樓閣望如仙  
徹底清江清且深孤舟直向月溪潯分明一片江程  
水盡是明公送我心

夜雨次韓致堯韻

月黑風薰臥草亭今年節早雨時行五更枕散邯鄲  
夢幾部林喧鼓吹聲幸有青山看不厭如無白髮老  
何成是非要息還添起來去之間笑此生

青石斧硯歌



昔歌肅慎砮今歌女真斧女真青石爲戎器肅慎氏  
惟厥鼻祖斧不穿孔挾以柯遇敵酣鬪袒褐舞憶昔  
高麗善用兵萬杵如雷築九城大金康宗烏雅束不  
能當吾拓俊京猛安與謀克棄斧走江北如今可是  
六百年耶嫩春山翠妍妍青州都護中酒眠健兒高  
歌耘石田石田多石斧今人耕處古人戰今人得斧  
無所用磨礱持作硯君不見老羌奮戟大破賊書生  
腕力劣磨墨

秋生

婆娑山下少人行江到梨湖更碧清幾遣經過移晷

坐不禁懷想屬秋生  
桑麻翳翳膏腴土  
童叟蚩蚩鹿豕情  
但得南陽歸臥葛  
何煩北海隱居萌

江村雜咏

江連堤柳柳連橋  
月地鳴鳴客弄簫  
興發不知行近遠  
扁舟或犯海門潮

蓼作紅花蘆白花  
松槐交翠映江斜  
絲竿掛壁罾鋪地  
知是漁家是宦家

滿載圖書逐水行  
流傳佳句使人驚  
臨風強欲相攀和  
星月輝邊愧綴螢

答李可用

潞

和陶韻



去去日以遠黃鵠高冥冥鴛馬戀棧豆寧懷千里情  
高士藐青雲朱戶視蓬荊所以隆準公辟洗高陽生  
薄俗重金紫古道誰復明草木忽搖落孤懷不可平  
出門望歧路蹙蹙昧所征豈無十畝田閒閒可耦耕  
安車不如步市童何所榮君子務其本萬物各有名

傷逝

何年梅不發君家祇是前塵夢也賒死別生離無限  
恨九回腸曲攪來沙

恭奉 睿製頒橘宮僚詩敬賡

后皇南國產航海旅華堂解包燦金色搯殼冽霜香

睿藻發天輝佳實爲增光宮臣詫恩頒賡什挹餘芳  
恭知四重謠萬里播蠻鄉

喜蓉城病起

君隨明月歛扉迴望眼愁眉驀地開他會固知傳者  
過自言无妄病之來燈前再整三分局梅下重驚七  
步才信宿貧家應惱渴如澆春酒莫論杯

題唐筵寄再從弟太卿

初淳

棕櫚小筵出燕中寄去非因製造工清慎使君爲政  
處指麾一境助仁風

南至前日



感人時序迫南至隔宵單檐旭晴還暄溪颿晚愈酸  
縱憐陽始復祗惜歲將闌獨對疎梅坐深房不受寒

山居春暮

收拾全春與雨風獨來林墅覓殘紅縱無亂落盈衣  
上猶有餘芳浥酒中啼鳥盡情良友近閒雲去態至  
人同百年哀樂將何極矯首支藜望碧空

讀畫

暖翠浮嵐絳葉陰參黃子久倪雲林論詩秘鑰拈論  
畫默契由蘇入杜心

書便面贈人

紙色綠如草宜爲童子扇老人却把翫鬢髮披霜霰  
伊昔倉下廬吹葱跨竹馬隣兒携綵筆豪侈向人詫  
步月率成近體呈沈孝田

啼禽棲定寂林端曳杖柴門白拾單嶺月初分山色  
暮溪颺猶作杏花寒詩人死去嗟何及社老生存見  
亦難思寫孤懷煩寄致更憐曾裏墨香乾

壺舍共賦

不煩禪悅與修真邱壑情安可養神出世於今知有  
法得閒從古豈無人百年自弄山間月千日長畱酒  
裏春富貴浮雲何足道吾衰大雅竟誰陳



屋後有石半入吾屋半屬鄰家將斥其垣或疑  
巨蛇穴其中遂賦此

要看全石斥隣牆人道其中巨蟒藏我却願他將眷  
屬化龍一一向東洋

書贈金宇夏

十載社中詩酒客半爲異物半爲官死不重逢猶常  
理生者云何莫對看惟有面皮可憎者朝暮相守意  
未闌金海之金字春叟工書屬詩衣未完最是風清  
月白裏朗吟聲如環珮珊山齋寂寞但松石微爾誰  
能發人歡我思非官亦無食不恠尋常阻團圓無食

無衣心自暇未必今世爾獨難雖然從此謝仕者祇  
交此世最貧寒生亦如死定何賴長時不見堪嗟嘆

長夏林亭往往有潒寂之時仍念十數年前騷人墨  
客之相從於溪石林松之間雖不盡來日以三四人  
爲率伊來或死或宦死者不歸宦者有守其不見一  
也唯金生鰥窮無依相守不去此皆理勢之所必然  
余之惻悵亦常情之不能已者故信手寫一詩與之  
聊慰鬱跂願春叟勿以自多於人亦勿德色於我使  
君不汗五日則與已死者同使君着帽安知又  
不如方爲宦者嗚嚟嗚嚟季夏千秋節前二日

有懷李天民禁直

饗院於紙署所多三百錢紙署終歲閒永無持被緣  
君以勞易逸惟懼不及然嚴廬孰便心饗院况夏天  
袍帶晝敢脫蠅蚊夜相纏是心愚未忖離索徒鬱悵



在昔晉唐世阮王有兩賢皆爲官醞故不憚自求遷  
風流耀一代美談垂億年東家痛皓齒西家要見憐  
至今衆人笑笑其忘醜妍將謂錢換酒瘦妻恐不捐  
世上形役苦又非錢可痊理炳心自瞭不待智者詮  
快雨過玉壺盡情滌林泉飛流噴白雪峽色發青烟  
竹亭擁窈窕蒼榆蔭檻前異禽時見集清吭醒人眠  
悄悄獨興居自疑學坐禪長日誰與晤兀兀披陳編  
臨風屢發歎邈若間山川

寄孝田

兩宵歡可旣此日又分携舌戰我常北首途君遽西

山雲朝氣散簾雨暮聲淒欲覓相思句清蟬碧樹蹊  
又拈坡公韻

缺月幽涼入酒瓶悄然林際度疎螢山川滿目秋光  
霽風露醒神曉氣靈人事正懷遲暮感蟲音欲徹老  
天聽醉間偏惜良宵邁吟罷新詩又說經

重陽獨上孟園

風落高桑夕照哀溪山處處菊花開前人已與寒雲  
盡獨抱秋懷上古臺

申生匡一宅會賦

情真親戚不殊看內屋招邀勸細餐匙滑頻抄雲子



暖杯濃已破雪花寒灰殘沉水拈香急詩險鼻山射  
韻難寄語諸君休厭倦人今頭白歲華闌

玉壺精舍與諸生同賦

騎驢心自問問我亦何哉不向玄巖去還尋白嶽來  
乾坤身外窄日月鬢邊催但可携新釀酬君雪屋梅  
客去獨坐無聊

有書還自讀有酒還自酌疑義雖紛紜誰與爲商度  
旨味雖酣適誰與爲酬酢紙帳梅影斜硯匣燈花落  
昨日錯履舄似開平津閣今日靜門閭堪羅廷尉雀  
自慚余誠疎敢疑人情薄白日誰信節黃昏空負約

人道重妻孥我行猶落魄好音自相和松陰萃四鶴  
相我不如彼胡然此寂寞殆已亦已矣醫俗真無藥

次蓉城人名雪詩

李白梅寒共絕埃非烟非霧亦非灰莫愁蝗種經冬  
在如意蟾輝不夜來繼日書窓明素卷颿風酒席灑  
深杯棲筠老鶴癡如我客子臨軒懶警開

觀技

數尋麤索縛杈枒飛上才人脚踏斜戲抵五禽真是  
巧身輕一鳥未爲夸抗時疑疑千危壁說處紛紛亂  
墜花好遣兒童齊拍手八風顛舞滾袈裟



路上聞三藐寺冰溪難越

行過遲遲峴下村  
僕人回報寺僧言  
山中雪較常年甚  
千丈冰梯不可捫

閭梅

溫如其笑凍如嚙  
玉貌冰姿故映人  
非是芳華千絕世  
自然清妙謝同塵  
月橫溪戶交寒影  
雪遍山樊見化身  
老筆尋常思賦咏  
祇愁庸妄惱花神

上元夜自玉壺赴社  
飲過苑署聞淵泉  
與諸文人飲明日賦呈

佳節催人近  
上元半輪明月北  
山村效嚙公亦田間

飲任笑吾仍社裏樽

公常笑僕與殘蔭寒士遊每謂田間飲是夕公所與飲者皆殘

署郎官而僕亦赴社火故頸聯及之

風景未應殊兩地棊詩偶自不同

門

是夕公賦詩僕圍棊達曉也

歸驢慣識花開巷信步行知過署

園

曉歸騎驢行至安國坊四街口驢欲向三清路故末句云

吟示社中諸人

商文攄緒到更殘此事非難竟甚難試憶頭邊明月影一年晴得幾回看

贈孝田

我欲尋僧去君能相伴否飯罷卽跨驢相待北城阜郊店遇體一上人率贈絕句



邂逅高僧野店邊  
休言此段亦因緣  
如將返照還相照  
不怕音塵隔永年

勸柳伯教復膺檢書兼任

爾與恆飢臥耐懣彈冠曷若趁春暄  
料殘每日堪中食  
院靜三宵好上番  
熟手何憂金匱曆  
散心隨喜玉壺園  
狂吟卽席聊相戲  
斗見詩眉緩皺痕

戲題自寫墨竹

自愛琅玕腕下生  
疎狂欲擬歲寒情  
世間多少繁華境  
回首猶餘一節清

次蓉城韻

早餘甘雨下花吐葉相兼翅重蜂徭減銜輕燕壘添  
政看移竹好寧間種葵嫌山圃揮鋤罷巾如漉酒潛

出郭

麗旭輕寒却可人沿溪柳色五分春林間處處棲殘  
雪猶似梅花落地新

山晴

徑亂草如積山晴花更繁縱橫一川水高下數家村  
靜憩鷄鳴午荒尋犬吠昏歸來向人說疑是武陵源

贈致鑑

常道高僧異俗情相思今見寄山櫻從知竟是因緣



種落個空時佛不成

送圓明上人還山

施言江月釋歸去守祇林却斷和光事重思發願心  
大藏猶舐粕初祖猛按針弱喪慚吾道彷徨白首臨

還京第途中與再從弟士猗

蘭淳

共賦

笳角風飄馬首聲幃車穿過亂山行渺然流水歸何  
處無限春風惱客情落日低銜雙嶺樹寒烟遙鎖廣  
陵城亦知信宿還家早猶惜黃驪隔一程

過北城外桃花已衰

萬點此飄雪明朝空樹餘但須斟泛蟻未忍策歸驢

錦帳隨行坐蘭薰漲吸噓臨風搔白首  
韶帳在開初  
桃花洞贈蓉城  
蓉城居士藐然身文采風流要絕塵  
選勝吟詩三百里  
桃花洞口最驚人

題畫扇

秋蝶依秋藥如何擬情緒江州老司馬  
忽遇琵琶女

率唸書尹彥國

命烈扇

書品如今第一人知君自與紫霞隣  
此身不是東家女何事相要強效嚙

送蔚山牧官李天民



百篇一斗騎鯨客千里三年牧馬官  
命與窮謀仍及老飢來驅去若忘艱  
春晴草色長堤暖月曙溪聲古店  
寒海上風烟如有得花前寄我錦囊看

瓦沼栽荷次韓文公盆池韻

易令爲濁又爲清小器公然濫盜名  
堪更可哀蝌蚪子認真圓沼內橫行

何如玉女洗頭池十丈青花人不知  
眼底參差新藕出恰隣叢籜解雄雌

浮餘卷紫始舒青有土培根勝插瓶  
水淺猶知空性具倒來雲影更涵星

觀古東李

翊會

便面書戲題

古筆精佳古墨香雲烟隨手自輝光問君何故拋經史還借鄰童急就章

壺舍映山紅盛開

忽看一堆火欲燒青松林白日光猶燄黃昏映更深  
滿園當賤目獨樹故驚心壺舍多花品玆惟不換金  
孝明世子挽詞

正嫡尊無比鴻名冊慶辰溫文猗日就孝友篤天倫  
三善虞庠古重謠漢邸新承華潛德久胥悅洽神人  
夏啓克賢日姚華祇攝時分勞符幹蠱古典卽家規



琬琰揚徽冊岡陵祝壽卮孝慈天所眷餘慶驗螽斯  
裁務王心合邇威遠戴恩泛舟蘇北路發帑奠南  
藩屈己方昭諫兼聽自察言蒼生真少福沒世可能  
諉

祧鬯今虛托人天竟孰爲謳歌還野哭磐石奄累碁  
慈慟將何慰宸情久愈疑臨欄望輶蹕猶似待歸  
遲

萬古青門道衣冠近懿陵人情何所泊天理竟難  
憑狀德明惟合循名孝最徵崩心今日祝冥佑在繩  
繩

才蔑毫毛效恩兼骨肉情夢尋黃襪日天問素廡行  
型範慚褒謬甌臾仰理明代身忱未格惟有淚餘生  
悼石閒

地下歸名士人間感逝年得君巾笥藏使我淚珠連  
往日寧知盛餘生復幾賢秋風吹舊夢歷歷杏簷前  
賀問菴六十一歲生朝

十月歲庚寅爲君以降辰適丁非古禮稱甲自今人  
物采風流篤歌詩頌禱新已知情所起未妨俗相循  
子粒齒叢雪卯斟顏駐春尠聞無肉飽多見有錢神  
素簔懷中置紋箋座右陳鮮治宜去乙烟吸貴從辛



拄杖青憐玉摘毫白賽銀雖菲心亦足如戲事逾真  
誰詠天南鶴應畱席上珍宿言聊此踐賀壽可兼申

與方承圓

鐵瓮城南方別將長安索米寒無裘時來自得不須  
喟雄府名藩何限州

次蓉城見寄韻

漂星冽冽北風嚴敗絮三更冷更添儉歲飢寒非所  
獨騷人愁病本相兼官殘不見無功酒食淡常思上  
舍鹽知道梅前題句處硯波成霰噤毫尖

澄泥硯詩

并序

有言市二硯者亟取視澄泥製也其一狀葫蘆其一方石皆十面有刻塵垢暗焉澡而察之乃唐馮承素摹蘭亭及乾隆帝題承素摹絕句刻畫精妙歟曰壬辰小春今五十有九年矣意者其內府物而不知何因至東國又不知東國始得者爲誰而流落民間復何因也余與柳君本學對坐摩挲賞玩以三百五十易之方者置諸傍葫蘆狀者贈柳君賦此記之庚寅南至後十九日也

金虎門西古橋畔兩澄泥硯列市聞我聞客傳便僮



喚戒走疾疾將錢換片刻携來供几案雙拭昏花注  
眸看一形巧剖葫蘆半一形方截削成岸十面細畫  
整不亂字字纚纚璣珠貫蘭亭搨貴承素腕乾隆絕  
句有詠讚兩皆刻此妙手段如玉鑱用金剛鑽壬辰  
小春製可按分明內府之珍翫墨瀋入罅結煤炭想  
見時時恣染翰萬里胡爲東海汧一朝真成溝中斷  
不入名士書畫幔却墮雜貨牙僧漢三百五十售直  
但銅青又非黃白燦摩挲爲汝足嗟惋昔貴今賤乃  
爾判曾聞神物埋豐犴一雄一雌分華煥此硯相隨  
不相散幾年流落民間竄我忽得之齒政粲問菴竭

來共賞歎君本是我好詩伴證交如石石不爛我如  
獨有於理扞舉一相贈心豈憚爲君送作文房冠隸  
楷行草消晁旰夜嗟心苦指屢彈弄斧般門那不汗

飯罷信筆

家裏豬炒與雉羹不及黎祈申廚烹朴家饅頭與煎  
肉不如韓甕芥菹莖向來家裏雖善飯往往便覺腹  
不平三日山齋飽兩物胃間澹淨神氣清胃淨遂欲  
羶葷忘神清不禁佳句生乃知五音及五色無怪令  
人聾又盲安得一併塵事謝歸去田園托樵耕

贈友人



已誦塲苗繫谷駒更看寒月照冰壺詩人自古偏多  
感吾道如今尙不孤肯使將軍無揖客夙知名論有  
潛夫醉來未覺曾襟露吞盡三江與五湖

憶故驢

物化靈猶有驢乎亦自知泉臺誰爾主峽路每余思  
草暖鳴生態缸殘踏不疑妙香羣馬足當日尠相追

次孝田韻

對此深春景相看不飲何絳梅嬌破笑黃鳥巧當歌  
月露蟲成篆光陰蟻逐磨研朱安所獲一醉較無多  
園鵝伏卵幾三旬而穀率爾戲賦

雌鵝伏卵視如瞠無咂無聲一月強氣化胞開離混  
沌形成毛傳肖爺孃他年定像王籠白此日偏憐杜  
酒黃胎孕知從男女後厥初何若破天荒

溪上晴朝

春慵老倦兩朦朧盤膝支頤小檻東芳草恰分紅杏  
雨青山初曬綠楊風生離死隔詩人盡歲去年回物  
色同流水浮雲元一呖等閒莫遣着曾中

李牧官天民自藍田至共賦

爲君花雨旆行塵對酌倉亭跋燭頻芳草歸思千里  
色春宵病話再生人却憐嶠海冥搜遍更艷文章富



有新惜別翻深迎喜地明朝況是踏青辰

花樹亭

并序

辛卯季春余在溪舍小園中從祖弟士猗自  
海西觀察營忽有書云海上海豚美不及  
京師然恨其莫與兄共之今奉錢十千遙爲  
兄治羹費發書讀之情溢於辭藹然可掬余  
因有感於中大凡人生至親之情湛樂自發  
於天倫不始於飲食然非飲食亦無以宣其  
因心之妙而致其所欲之重此伐木之什咏  
自周公而花樹之會昔賢所由設也士猗其

猶得古之心者乎醉飽之歡止於一霎中心  
之藏孰如常日遂以其錢構小亭于是園扁  
曰花樹以待士猗之歸其未歸也則余之思  
士猗無日可忘其既歸也則四時之景相與  
坐此亭治酒食談笑燕娛叙樂事而終天年  
不亦樂哉屋宇久存者也雖百歲之後吾兄  
弟情好之跡可使因地而存不遽隨生而泯  
云

三復來書坐小園十千不用買河豚感君花樹真情  
發剪我茅茨妙理存亭壽百年應話德羹珍一飽孰



求痕愚兄賢弟均今老式好宜令示子孫

溪屋卽事

翠竹紅樗午景遲黃牛抱犢麥生歧茅檐倦就羲皇  
夢却有林丁報晚炊

次李天民東京懷古韻

鮑石高亭出海沙哀絲急管咽晴波誰知門外韓擒  
虎闢斷春風玉樹歌

拈杜韻共賦

擬辦青銅賃釣船梨湖好趁麥黃天彈前鴉炙人應  
笑樸裏魚羹興已牽蒼雪由來稱泛宅綺羅何必設

芳筵去秋百斛都收秫定不令君羨酒泉

聞蓉城新卜鄉居率吟贈之

九鳳山前木岳村數雙田畝擁柴門病妻弱子堪新  
托農叟樵童似舊恩宦澤誰無羸俸得鄉居君自宿  
緣存明春會待驅牛訪壁上聊書樂志論

促織

促織復促織唧唧何唧唧露冷不知寒宵長不知息  
如怨又如訴如有所催逼人蟲不相謀情性殊所得  
如何一聞爾使我懷悽惻掩書隱燈影嗒然喪聲色  
側身望天地悠悠無終極一身既微眇胡爲任欣戚



人言萬物內最靈具天德文彩叅造化五官皆竭力  
如我所思惟憂患由知識羨爾乘自然但鳴無思憶

次李天民七夕韻

一逢一別淚雙垂靈雨年年指驗奇天上星辰超慾  
界世間男女托情思橋成信有鵲輸力河淺那無牛  
渡時好事原初誰勑說祇今才子愛吟詩

昨夕意有所感謾成短律

迢遞雙星夜飄飄一葉秋銀河雲影澹金井雨聲收  
何與人間事思分天上愁簾波涼不動纖月瞥經樓

早秋憶中浪田舍

豌豆斑斑早稻垂晚菰菜蕮葉初滋城中想得田家  
樂又近前溪撈蟹時

次東坡韻感秋

石背脩脩竹籟細石面陰陰苔文閉夕陽登樓試病  
骨清涼滿檻鬆雙袂紫薇競紅蕉競綠可怡終非久  
長計墻角三松誰所種百年秀色四時繼却爲悲秋  
復憶歸東望青山似佛髻此山之下碧江流漁人泛  
泛應遺世

山屋次李天民韻

最愛書遮眼勾人到睡鄉便能違午熱何必待秋涼



斷續芸香氣朦朧竹簟光不知周蝶境真否似今印

花牋

百張雲樣亂花開七字文頭艷錦回浮碧空從天上  
得殷紅應是日邊來捧持價重凌雲葉封裹香深笑  
海苔滿篋清光應照眼欲題風韻愧凡才

答張混賀晬

去年投火棗今年餽雪梨張混賀余晬每年兼有詩  
余受啗且讀忽然有所思美果雖不種將錢可得之  
佳句自曾出夫人寧妄爲華贍有魚雅典型非末衰  
相識數十年不謂如是奇哀哉國俗偏取人無良規

不問才脩狹但視地崇卑昔哲歎棲棘於爾信可推  
見爾窮欲陪余懷有忸怩使爾抱珠玉造物真戲嬉  
慎莫憾厥初天道奈人私千駟或無稱爾詩獨余知

次迢根韻

秋聲秋色日知深贏得霜毛鏡裏森閒坐是修來世  
福微言倘合後人心自將碁局看時務漫憶鄉園屬  
夜吟死了終成携不去此生無意滿簾金

更次

落落年光過半深更添愁絕雨森森天非有意催時  
運人自無端起暮心切促階蟲偏夜訴飄飆井葉漫



風吟故園秋色行將近楓染丹砂菊散金

曉起疊前韻

露華淒白感人深天地中間有肅森  
衰盛死生元一瞥賢愚王霸更多心  
犬何所恠成羣吠蟲自無知效  
苦吟曉倚空樓思晚計終然枉擲買山金

壺舍前阜早望

峽色如醒夢朝暉澹北林微霄澄帶郭涼  
碧曬連岑遂引登高興空懷適遠心  
寒蟬情未斷抱葉試孤吟

擬古兩頭纖纖詞

兩頭纖纖遠山眉半白半黑局中棋  
膈膈膊膊仙鼠

飛磊磊落落霜林梨

近體一篇送上行人鄭經山

城壓重溟野圻遼君行縱目尙心料山河不爽文書  
覓秦漢無關日月消左海聲詩名已炙高風縞紵事  
堪翹贈刀人若遺孫在刺欵通家迓綠輶

送人之燕

城頭望海海潮生白浪乘風撼塞城漢使不來槎自  
轉秦皇已去石還驚桑田反覆千年事雲樹蒼茫萬  
里情此日流觴須盡興當時採藥竟何成

夜起咏牀梅



睡眠微微開朦朧識小梅暗香凝枕角疎影隱屏隈  
不記燈懸在翻驚月照來悄然成一笑何處玉人迴  
臥雲山房示李天民

五更渾不寐兀兀坐山窓松韻清依磬梅香暗護釭  
警寒哀院鶴吠雪怪村茆緬憶平生快冰車月一江  
水仙花

羣芳之外獨超然水石生涯品是仙桂殿銖衣雲縑  
縱漢皋瓊珮月娟娟香魂不墮繁華夢冷性無干閉  
塞天我已息交君少侶祇宜心結歲寒緣

寒食

柳風吹送賣餠聲  
午睡醒回遶屋行  
草色重憐湖土別  
花飛漫負野僧情

踏青前夕值雨宿北倉謾吟

踏青時候雨聲聲  
來日花應遍漢城  
但使隣翁饒舊興  
猶堪病我試新晴  
文鯁臃膩珍無對  
綠蟻筍香妙莫名  
社裏同人三損二  
春風那不念餘生

次人遊洞門韻

爲覓殘紅在相將  
到北林杵遲花影  
晃鶯歇洞門深  
芳草圍身定青天  
拍頂臨醉醒雖異  
態仁智且同心  
與寧野出北渚同  
吟



不問花誰主行看遍一村詩成流水外  
某對古松根  
山日捎林轉溪雲釀雨昏悠然思止宿  
清興湛餘樽  
宋老何年築桃園甲一村起居無別幹  
衣食自成根  
石澗情今古雲巒態曉昏有錢應買此  
書卷伴琴樽  
前身知是蜀魂禽萬化猶丹一片心祇  
爲東風啼血  
盡惟餘玉骨到如今

白杜鵑

山館書感

文心一似鳥鳴春交道常看玉去塵  
喁許君爲前者  
唱典型余與後之人斷無大易輸玄草  
能有丘明作


素臣嶽色泉聲通氣味樽南硯北見情親

階下竹

種得琅玕綠染新炎天石畔見精神  
孫枝千萬凌雲起百世清風摠一身

楓皋集卷之六









泉楓

三